

序傳上

張氏之先蓋出黃帝賜姓易緯是類謀言黃帝吹律定姓張王李趙皆黃帝之所賜姓也

通行易緯無此條依甘泉黃奭所輯漢學堂逸書攷路史國名紀國姓衍慶紀原補張樹養素堂文集亦引之今據為說黃帝臣有張若周大夫有張仲是其證已世本廣韻元和姓纂

唐書宰相世系表必求其人以實之謂是黃帝第五子青陽生揮為弓正觀弧星始制弓矢主祀弧星因姓張氏殊失之鑿宜通志氏族畧疑非賜姓之義不欲從之而直以為晉公族解張之後以字為氏也攷解張一稱張侯其子為張老後有張孟談佐韓康子滅智氏遂列韓于諸侯至張開地張平五世相韓是為漢留文成侯張良所自出鄭氏之言信而有徵已然無解于張若張仲皆在解張之前張耳張蒼張越張瞻師張負張同張釋張爨等與張良並世而不必出于韓即不必為晉公族後則張固有二源僅舉其一不知又有其一亦未免不達也兩京而降支派滋繇以門地論之凡有清河南陽吳郡安定燉煌武威范陽隗

合川縣志卷六十二 序傳上

為沛國梁國中山汲郡河內高平十四郡望幾幾乎與王謝崔盧相雁行矣顧欲究其某為古姓某為姬姓如留侯世家之序次瞭然則書缺有閒固無人能言之蓋奠繫世辨昭穆之學之不講于天下久矣吾族舊譜相傳為宋越國公張世傑裔則出自范陽系當非不根歷元迄明子孫分散湖湘閒或轉徙至思南主筦沿河司土司事數傳失職遷蜀遵義府之正安州軍興流離歷桐梓綏陽至重慶巴縣之文石漕鴉溪河居焉一傳遷合州插占東里芋荷溝時制聽民以標竿插界為自占之業謂之插占為我張世業時清康熙十九年也三傳至張天述字玉白早卒天述弟琦淮于乾隆末為太學生與舉人劉仕欽勗興振東鄉學于上下雲峰寺閒亦稱雲峰鄉學為吾州鄉校之始語詳學務掌錄天述生志遠字廷秀志遠生學隆字震川以營礦業家中落學隆生子三長興德為里塾童子師季瀛出嗣高氏中子興仁字壽山森楷父也壽山以工小楷知名嘗為人給喪事寫金剛經起甲夜宵分而休人驚其速有印本之目然以用目力劇中歲病失明貧不自聊賴妻劉搯拄而活語具列女傳一同治五年壽山病革詔劉及森楷扶牀語之曰予不起矣兒雖稚尚能讀

矢人函人之誼可思也成龍上天成蛇入草唯所擇而已于汝云何並
泣對曰唯不敢忘既葬森楷讀如故力稍不支族叔曾祖志大聞之召
往讀其家二歲試童軍不售又六歲光緒二年南皮張之洞以待讀督
蜀學取爲州學生年十八矣明年南海譚宗浚編修繼其任再試皆高等
餼於庠同州人丁樹誠戴光肆業成都尊經書院盡發所藏書讀之輒
慷慨太息以謂年力有限載籍無窮不致志專精以從事問學徒敝敝
焉制科之是務雖兼營並進惟日不足其能原原本本殫見洽聞分儒
學之一席乎宋人有言早知窮達有命悔不十年讀書今窮達不可知
而餘十年或二十年之力以讀書則權自我操斷而行之庶後無長悔
也既秋試報罷又以事爲人構于院長湘潭王闓運削弟子籍去轉就
錦江書院讀院長邛州伍肇齡森楷先受業師也故嘗以時文相取至
是則大喜使爲院都講兼典書局管書籍事森楷益感激奮發自矢于
院長曰循此以往三十年苟不于學界中特樹一幟成業發名以張吾
軍而與尊經旗鼓相當者有如日院長領之退乃自立不爲經學詞章
不應歲科優拔試不事書畫詩詞應酬禁約三條而專攻史學且專力

合川縣志卷之二序傳上

二

于人物輿地二種意以其爲尙友所資用世所繫也偶有一得隨筆劄
記積日既久箸錄遂多治絲而勢殊費稽檢勢不可已則略依著述體
別類分門發凡起例爲通史人表原名歷史人表後以并包史部各書乃量改今名今從定稱歷代
輿地沿革表附形勝險要攷二書各例言若干條其關於二書間之譌
文駁義及在二書外之舛字誤畫孳乳漫多掃除難盡非別爲書記識
幾于不可爬梳則更爲二十四史校勘記初名讀史質疑後改今名說詳校勘記自序以與
前書同時進行如驂有靳然而牽涉過廣繳繞尤滋思以多岐亡羊或
遂一無所得姑輟地學弗治唯存其例言七則今錄以就正有道曰輿
地之學首貴正名而古今沿革不同南北僑立又異非列表以證明之
雖有圖猶不瞭晰也故特爲沿革表俾地之可以名治者自古迄今名
各不同皆聚於見名之下見名以國朝爲主在表格外大書表凡十四
格首秦次漢次後漢次三國次晉次南北朝次隋次唐次五代次宋次
遼金元次明各以末後一字爲綱依今韻編次名有京省州郡府縣之
殊序次先京次省若州若行臺若總管都督府若藩鎮布政司次道若
觀察若廉訪若提刑若轉運使司次郡若府若軍州若直隸州若單州

次縣若道若衛名有今有而古無者但曰某朝屬某縣地名有古有而今無者或爲場市或爲邨鎮其猶存故名者彙附于後其故名已不存則入險要形勝攷中凡一地之險要形勝史文已見者固分別方里附載左頁或載籍未見而確知爲其地之險要形勝亦依方里載入用備參攷其人表例言曰人表之作肇自扶風其等有九以別高下中多舛繆世頗譏之森楷鄉曲末學不敢望及班氏項領何堪再循前轍祇以生性闇劣嘗讀史書苦於紀表志傳之參伍錯綜處多有抵牾鉤稽爲勞又或偶記一事而其人姓名字及其立身本末茫虛莫憶恆用廢歎因是輒出鄙凡竊取漢書舊名而變其九等爲十六目所有倫彙各從其位其品誼高下槩不置議此表因讀史而作凡秦周已上都見於經春秋語策亦非史類兼以元凱各譜宛斯諸表翔虛其審閱之又精贅既無庸繇尤不殺難可簡括誼從舍旃其經說注疏叙錄所稱引儒曩先故事仍加采錄不在此例曩見吳荷屋中丞歷代名人年譜起漢元年不溷雜以經事體例致爲嚴明今依用之但取自漢至明史部有名諸人正錄於編不更上及通史名昉蕭梁元用史記舊例哀合數代爲書誼取通貫古今通志蓋遵依

合川縣志卷六十二 序傳上

三

之此表雖亦兼綜歷史不名一代而斷自漢下略有界限與馬班鄭氏例皆小異又意在於旁搜博采通苞乙部諸編不墮取材國史抱一自足故雖名近蹈襲而實獨斷別裁未可竟以舊說相繩調失猥雜紀事編年史家兩體獲麟絕筆馬班代興紀事之書專爲正史編年不作其體幾湮荀袁復古猶未章顯涑水氏出紫陽繼之編年始還鉅觀第通鑿蒐羅餘富官書私牘靡弗賅覽甚有采及小說者衡以史例似可不登然文正當日參稽心苦其所收錄絕有鑿裁非同文人者博漫無限斷猶待讀者抉擇也茲一比諸正史悉照所有錄之而注明出通鑑更不詳注所引某書以昭尊重李燾長編畢沅續鑑並放此古史別史雜史霸史等書元與正史相輔而行偏全雖異記載無乖所有流傳悉從正錄如華陽國志十六國春秋東都事略等是非苟愛奇備史體也閒與正史駁文亦有較正史爲得者則必別白是非登爲攷證不敢舍官求野致滋然疑其或元書已佚僅見稱說如楚漢春秋續漢書之類則應注明某人某書所引庶無初見虛造之疑但篇中此等書不下數百千種或數見數十見不一各爲察察加注殊嫌煩冗今於篇首列引用書目一卷自目見各帙外凡采自

他書者統於其書名下注明引用出處俾有根據篇中當條祇注元書與目見者同庶幾詳而不瑣雜家說部官撰私集名山金石文字等書多與正史出入在修史時卽已分別去取非竟茫然後人不咎轉有蒐采異說以難正史自矜翔獲雖未嘗無一知半解足以補闕拾遺而較其大體固猶當在君子後矣此表於隨陳已上取此數種書之有關史事者詳加揆葺取備攷證引注例如上條非是則從缺如唐宋而下條流滋繇毀譽多失僅取其爾雅者攷證及之雖獲固陋之誚所不敢辭史漢諸表自專明世系者不能紀年外餘皆年經人緯便因年徵人卽人攷年也此表竊師其例紀年於表格之首而不用甲子紀日添注閏月於當歲下以備考核其或年號重複慮有迷誤則仿李申耆紀元韻編之例爲紀元韻譜一卷依年號首一字四聲編次明注本表卷數於下用便稽檢且異因仍帝王統天立極爲世共主古人於正閏之辨爭之甚力有伸蜀絀魏者有存唐奪周者森楷媿鄙何足與此第以大位苟尸尊名已據卽不假人要須紀實倘固抑不叙則其政事人物無所繫屬將失攷證資矣此表於世稱諸正統外如王莽孫權劉淵武曌楊

行密趙元昊等諸已稱號改年者卽錄入帝王格其事及其子若臣屬焉而追尊皇帝如曹操司馬懿等皆不得書卽臨朝稱制如呂后者史漢通鑑並各爲之紀而森楷以其守府有人名號攸屬未可輒以太后屬於帝王致疑溷淆則呂氏仍但入高帝后妃而惠帝後以兩少帝紀之或疑兩少帝非劉氏子未可以代呂后紀年者森楷別有論辨見鄙著讀史平反論中其王莽等雖列帝王而書斥其名且首冠以僞字旣用藉別正統亦庶非獎進亂賊云史記將相名臣年表帝王格下有大事記凡以因事徵人卽人見事法至便也今改爲本事記且升與帝王同位不更別出一格者意以表祇表人不可閒雜以事而其事多由朝廷出則亦不過帝王之紀錄耳篇中於凡當時所行禮樂征伐諸事分年備書而名臣賢士之生卒亦附見焉其於本表無甚關係者雖大事或略不備載故參取唐人本事詩之意名爲本事記云凡附出之日例附論當條下不別爲說本事記爲特例故專論之后妃立傳始自陳志蔚宗因之遂有專目後人據以議史記之外戚世家漢書之外戚傳蒙后妃於外戚爲過似矣要其肺附連屬固非若風馬牛之不相及也今表於皇后已下良家子已上凡在宮中有位號者及無位號而被御幸者

皆入后妃格其父兄弟姪之屬各依所見年坵之或秉權勢成功名更從其重而互見焉帝王諸子史各有傳孫曾繫之明親屬也而晉書之愍懷太子妃隨書之蘭陵公主乃皆夷於列女不已疏乎班氏以史良婦王夫人入之外戚比於后妃在彼書傳固當此若遵之失提肴矣非通例也今以皇子之分封及皇孫之蚤夭者與皇孫之及祖父世封王若嗣王者入於皇子孫格而公主泉皇子孫之夫人坵焉其追尊帝子若魏武帝子陳思王等祇入文世宗室及它人賜號公主者若漢龜茲王夫不與此論宗室托體天潢列史之以此名傳者祇開創之君兄弟諸子及它族屬數人蓋寥寥也而遞而推之則皇子孫而下何莫非宗室矣今表於宗室之箸列者及皇子之孫曾襲爵異世者皆以入宗室格其有宗室王侯世表之代則王較詳而侯以下或差略焉凡嗣侯者非甚知名及有關叙其某傳某絕不更通及宗婦宗女之有以事見者皆各依事坵於其年大臣之名由求難許而匪道以位伊古可勝數焉今表於漢自御史大夫從公將軍已上後世從一品將相已上皆入大臣格而於其除拜之年箸之登庸後黜降者列於登庸之年有先參副兼行領守後正拜真除者列於正拜真除之年其加官不治事如晉宋下

之開府儀同三司唐宋閒之使相用事非其官如漢之尙書令魏晉之中書令齊梁之領軍將軍皆各書依其官不得與此若唐初之同中書門下三品明初之五品大學士則又真爲宰相不限此論其官品區分別爲職官勳爵考一卷備言其審六卿分職周官綦重後世或九或七又置少卿其祿秩朝列多與校尉都尉雜號將軍同世所稱卿校也今表於漢自中二千石下比二千石上後世自正二品下從四品上若卿若校若從卿校列者名詳職並入卿資雜將校格其以將軍校尉等號爲刺史牧守及以尙書侍郎都督出爲督撫總兵提督等官不在此例唯領護都水行河隄使者總漕總河諸奉使無事守官仍列於此八伯九牧古皆諸侯爲之後世建國則立藩司民乃作牧官爵雖殊其守一也茲表以歷代之王公侯伯及比二千石已上之守尉刺牧從四品已上之府道藩臬撫督巡按等官皆入藩牧格其魏晉之關內名號君侯唐宋之單車刺史及以它官兼統遙領者不與或自列侯牧守入躋大位則各隨其所至官書之庶僚之名史無特指而內自公卿外自方面外凡師師濟濟者皆是也茲表略爲界畫斷自漢比六百石後世從七

品已上漢千石後世正五品已下並入庶僚格其漢斗食吏至四百石後世未入流至正八品別爲雜人不與此列或有以列侯牧守入爲此官大臣卿貲降終於是則仍歸其元格此不復贅儒林列傳史漢相仍文苑之目初標范氏後代踵作沿革不一要別主名非判氏印也茲表儒林大書文苑夾注匪有軒輊良限篇幅耳凡夫道德學問文章之士見於各史所立儒林文苑文學道學諸傳者舉得參錯列於其中卽散見各列傳及諸紀表志中而名實相符者亦並入之唯置身通顯兼都事功如歐陽修王守仁等始各依類移置不拘此格其所著述仍互見本格中各史所傳孝義忠義孝友獨行高隱逸民隱逸止足諸人稱名不同制行亦異覈其所詣要皆以行義著者其有助業文章各依品彙散置如或名位未顯僅以事見漫焉醜夷賢否焉分今特立行義格盡舉上列諸傳之人一歸入之用異凡恆至若策士俠客雖或言行殊絕不軌於正而要其磊落英多非常人所敢望也今亦參置其閒而別出畸人之目唯賊很敗常附逆助亂者仍不得與九流之目始自劉班後世儒家特出不與諸子等夷名墨諸家廢絕弗傳傳者道法陰陽神仙

醫方數家而已兵農縱橫雖亦塵存至微不足道也佛氏晚出不與此列乃獨駕諸家而上之所謂變本加厲者已伯起穢書特爲立釋老志殊爲無謂唐修晉書併入於方伎傳後世因之明史乃以陶仲文僧繼曉等廁之佞幸則其趨愈下耳欽定四庫全書總目於諸家之授受不絕者各依其類著錄子部餘則統名雜家義例致爲大雅今謹師用其意目之雜流其星相巫鬼堪輿倡樂碁琴書畫木石工巧諸伎不足名一家者謂之藝術並雜出於其閒古有名位卑微制行平常之人以官以事皆不足述而史傳或因人牽連附見或因事宛轉得書旣不能一槩刪除等之自檜則雜人一格固執所不得無也然必人皆備錄一弗持擇齒齒鱗鱗亦烏用是點鬼簿爲今以歷朝掾史僚佐已下之無所成名者併入雜人而必取其與人事相關或姓名希奇傳聞殊異足有資於攷證者始甄錄之斯無闕濫之弊列女正史有傳初始蔚宗意蓋取配列傳美惡雜陳劉向列女傳例已如此非調節烈之烈必純而不可駁也而劉子元顧以其傳蔡邕女爲譏失不諗矣此表於古來婦女登諸史策者自異姓王公侯伯太夫人夫人命婦已下婢媼巫倡已上無論貞淫

胥入列女其有悖逆作賊如徵側唐賽奇才異能如洗夫人秦良玉等則別殊異其事彼此互見期於各不相掩古之宦者給酒埽供使令而已人至微賤無足道也自漢以後乃有閔孺籍孺之流見幸人主貴寵一時至恭顯忠讓等出弄爵含憲竊擅威福而敗家亡國相隨屬矣史公之傳佞幸蔚宗之傳宦者非張之也或欲蓋而彌彰固猶是春秋意耳今立宦寺一格而以佞幸附之其或由此洊致大官則各就其所至而互見焉真人初起風塵擾逐竊名字盜土壤者不可勝數列史所以有羣雄傳也中葉承平之世苟欲效之軫不爲盜賊矣要其桀驁不馴甘心戎首大都與躬親弑逆者氣類略相同焉今表以羣雄爲雄據大書其所稱號與其姓名如西楚霸王項籍之類而其臣子徒稱姓名以別之下此皆爲逆賊附於其後或有本官大臣卿貳藩牧者則各從其所重相爲互見夷裔之目古人多以在本國外者當之如史漢之兩粵朝鮮匈奴西域諸傳是也而宋書立索虜傳魏書立島夷傳乃以彼此詆謔滋益口實非通誼矣今於魏西魏齊周遼夏金諸國及十六國十國之有載記世家者皆特自爲表而以四裔荒國及中國邊疆之士司若羈縻州

合川縣志卷六十一 序傳上

七

入夷裔格其有自彼來降自我外叛者別爲降叛一類附之此指一統裂之世則於本事記書某叛降于某而此格不見其文惟于所降之國書之其來降者同若來降後更以勛業顯著則各見於其官不拘此論歷史於君爲之紀臣爲之傳大端已盡其別立名目者后妃皇子而下畧可指數也此表意主分明其史舊有名目因卽依用或從而分合之其所無者則出鄙肌標舉通計爲類十六附目半之自疑上下古今人無或出此矣若有闕遺不當尙希高明有以教我計表大目凡十六格自將校合卿貳文苑合儒林畸人合行義藝術合雜流無異文外其外戚附后妃公主夫人附皇子孫宗婦女附宗室佞幸附宦寺逆賊附雄據降叛附夷裔等六格所附文皆自左之右略仿史記將相名臣年表倒書卒罷之例以清眉目此表專以表人凡其姓氏名字謚號爵里生卒年壽例備書之庶資攷鏡但各史列傳有元未詳錄者如叔孫通嚴安等皆未言其竟有熟在人口而元書無文者如司馬子長徐仙民等是雖見它說祇入攷證斷不羈於正文轉疑杜撰其有本傳無文而本書它傳及表志言之者如許廣漢字伯見霍光蕭望之傳韓說字少卿見百官公卿表之類則仍正文箸錄不用此例至遼金元三史人名皆係其國方音譚譯多有繆誤自欽定

國語解出始得正字雖名從主人而去譌就真固所以成考文治也茲
悉謹遵國語大書欽定之名而別注云元作某庶不迷替諸人有特傳
者有坳傳者有入儒林文苑忠義等類傳者有見它人傳者有見紀若
表志者有見史注者有見古別雜史及諸說部集部泉金石文字者今
悉錄爲正文而注明其出處於末以墨方圍界之其有箸述則接錄正
文後在出處前或別互見儒林格諸人有宜數處分見者則擇其所最
重之端具書事於其格而於其所繫屬互見之其差輕者從略如漢劉
宗室又當入儒林又當入卿貴則於宗室格注其爲楚元王元孫云事
具儒林而卿貴無文以儒林重於卿貴而宗室之屬不可沒也宋童貫
當入宦寺又當入藩牧又當入大臣則於宦寺格注其爲奄人而云事
具大臣藩牧格則無文以大臣重於藩牧而宦寺之實不可掩也它皆
類凡具事處未注出處後云互見某格其互見處但云事具某格而出
處則不重注以省餘文大要此十六格中自帝王后妃下大臣較皇子
爲輕而較諸格爲重其以皇子爲大臣者則云互見大臣事具皇子有
涉外戚宗室雜流宦寺佞幸逆賊降叛者則各以類注之餘格則否過
此則儒林重於諸格卿貴藩牧以次遞推略可意會云諸人有開國承
家名德相繼者則於其始起之人注明爵里其出處後繫云子某別見

合川縣志卷六十一 序傳上

其子格則但云某子而邑居從略

如周勃沛人封絳侯云云子亞夫別見亞夫則云絳武侯勃第二子紹封

云云不更言其爲沛人是也

或子無聞而孫知名者亦同

如賈誼云孫嘉別見丁若禮云曾孫孫義別見是也

後徙它處者則別更注明不復相襲

如班壹代人其孫况則爲扶風人楊季江州人其孫雄則爲成都人

皆于况雄下注明是也

免涉影響諸人事實有本傳失之而它傳表志紀及它書

得之者則仿通鑑攷異例別加案語分別是非云今定從某其或傳聞
異詞不足以勝本書者則亦標舉其說而略出鄙凡爲決斷之云今不
取有不能定則但議而不斷以待高明若已爲古近儒先所及則必名
舉其說無敢掠美歷史表目例皆載於表首後頁則否蓋箸述之體不
欲過煩瑣也然積遠迷替閱者苦之昔人所以謂表難讀雖劉子元亦
且欲廢表矣森楷此表爲數尤蹟既恐它人迷離先虞及身恟恍輒仿
洪飴孫史目表例篇各爲目雖違大方差覺清朗變古之譏尙其亮我
此表自漢至明爲年幾近二千人殆不可數計魚貫而數已覺煩難又
緯之以表格雜之以坳目縱橫交互尤難稽檢兼其中姓名相同時代
近涉恍惚疑似者不足而一非有以條貫之幾何不興歎望洋也今於
卷目外按照諸人姓氏分別國姓師姓家姓庶姓略依方音類編爲目

錄四種都若干卷弁之卷首用便訾攷已上各例略舉大凡其或偶不畫一如周仁卿賁互見佞幸董賢佞幸互見大臣田蚡外戚互見大臣竇嬰大臣互見外戚曹操大臣互見逆賊董卓逆賊互見大臣之類要皆鄙凡量爲斟酌非盡漫然鈔胥無所取材也以其篇中變例爲說較長嫌於篇幅不盡併前例中未暢之意別爲例言畚問坳于卷尾校勘記例言曰一校勘記以文義事實典制爲範圍不濫涉及文法議論唯體例問一及之一校勘記以文字音讀訓詁爲要點雖片言隻字小有異同無論有無關繫均必切實審訂一不疏略其事實典制等則非有乖舛應加辨正不輒妄爲敷陳輿地視此一据校各本爲己所目見者直僞某本作某若非目見而轉据各家所引則必先出其人以實之示不掠美且異蹈虛一無論目見非目見各本唯參取其確實精審或誼較長者臨時折衷從之不先指定一本致貽抱殘守缺之誚一既審定所從則或改或補或刪或逐均必逐一說明著當條下使皆可就原本覆按免懷私造武斷之疑一据善本改補刪逐有事理明白不待煩言而解者但標明元誤作某依某某本改逐刪補更不別爲說明以省繁

冗一傳本各異而誼得兩通或各本不譌而一本獨誤其刪逐改補與否例如前條一各本俱誤而有見于本書他篇或他篇注所引確知其爲元文不誤而俗本傳譌者卽照從善本例照爲改補刪逐以還最初之舊唯必說明其所以然之故爲著于當條下一各本俱同而疑誤難明更見于史部他書如兩漢紀通鑑之類及魏晉唐宋間名著所引如三國志注太平御覽之類乃較本書特別瞭晰于誼亦長且屢見俱無異文足知其所見本不誤亦非有所增刪改易或但槩括其詞者亦通用從善本例如前條一別書所引雖較瞭晰誼長而或前後不同彼此互異則不免于增刪改易或但槩括其詞非必純用元文祇爲隨條說明不敢輕有更動一所校各條或旁或頂俱放阮氏十三經校勘記之例各于所校字旁加點爲識一本書及各書所引皆無異文祇他書所載與本書時有出入或大相徑廷是爲書傳駁文或係傳聞異詞謂之根本錯誤應別攷辨不入記中自各例言成立我用我法更歷多年間有變更要無作輟中嘗有傳程業修續修合州志相示者丁樹誠戴光皆以其庸鄙疏率近似無文相約私修以備掌故森楷謂然惟方有事史學殺青

尙遙謝未能也而有志焉或以久淹日月無補饑寒且妨進取諷之森楷爲仿解嘲賓戲之意作醒諷以謝稿佚存繇是一意孤行鏗而不舍犯寒暑忘寢食勿憚卒苦于無書無貲而有老親不得不折節舌耕爲仰事計乃受振東鄉校之聘大分其精力爲生徒講授改作終歲勞勞耗日力且泰半居數年逾壯齒又二廡補校各史至晉宋間以下善本尤希幾無措手聞張南皮師督湖廣藏書夥欲就借讀之以卒業慮不得請輒挽伍邛州師致函先容森楷亦自上之書曰蓋聞唐韓愈氏上宰相書引詩序曰菁菁者莪樂育材也言君子能長育人材則天下喜樂之矣又曰菁菁者盛也莪敷艸也阿大陵也言君子長育人材若大陵之長育敷艸能使之菁菁然盛也又曰君子長育人材既爵命之又賜之厚祿以寵貴之其意激昂自命欲以見知於天下而其說乃出於爵祿寵貴之一途故世儒或訾焉然其所成就者自不可掩也森楷生三十有二年矣本出單家未嘗有舊族世士之交遊以相爲援引又性多狷狹不能隨時委蛇往往出與人迕不獲譽而得謗故干謁當路以假借名字交通聲氣之事曾未始一爲之不惟不敢且不屑也弟念人之

合川縣志卷六十二 序傳上

十

有生與天地參苟具七尺之軀而內無得於己外無裨於人則醉生夢滅泯焉與草木同腐固以負祖宗而慚明神矣卽或少能自立而資力有不及方域有所圍勢必得其人焉以相與有成願乃拘牽流俗隱情惜已不肯向其人者一吐則是志不獲展業亦卒無所就雖窮老於溝壑實無以自永於天地夫誰知之而誰惜之吾恐蘇明允氏所謂棄天之罪正不必下於逆天違天者也是以不揣其愚敢略陳說伏惟夫子大人矜厥樛昧裁覽而幸教之蓋森楷幼孤露渺見聞始童子時應試重郡市得日知錄殘本竊愛玩焉塾師以其妨帖括也訶之卒不能忍舍尋蒙夫子大人試補博士弟子賜以轄軒語書目答問二書益廓然如有所見後二歲從州人士之尊經書院肄業始獲覩十三經廿四史之全及諸儒師說百家方聞之廣大遂一奮然肆力於學思欲博綜貫串通達致用而資性苦闇治絲棼如方枘立類例擬爲周官通攷以參合禮典之同異及其職事之因革艸創未就會湘潭王先生來說經不合又它事齟齬讒人交構因輟業去旣秋試連被放彌益侘傺不能掣經更從伍崧生師借取乙部書讀之覺其糺紛繆盭躡駁舛互之處較

經尤甚而能整齊故事考訂文字俾前人無遺憾後人可遵信足卓然

名大師者自錢宮詹攷異外惟趙氏翼劄記尙於全史有所發明齊召

南杭世駿等之攷證王鳴盛氏之商榷則多虛文敷衍自欺欺人惠棟

洪亮吉全祖望王念孫梁玉繩陳景雲諸君僅祇致力數部顧絳何焯

朱彝尊閻若璩李廣芸氏更但於所著書中畧一及之而已萬氏書未見不論

而又不无疏挽供人指謫則非專家故也用是竊不自量隨筆標識尤

留意於姓字爵里謚號生卒歲月著述謂卽論世知人之實證積久漸

多難自稽檢因取班氏人表舊式變其九等之目以名位相次計得帝

王后妃皇子孫宗室大臣卿貳藩牧庶僚儒林行義雜流雜人列女宦

寺雄據夷裔十有六格而外戚公主夫人宗婦宗女將校文苑畸人伎

術佞幸逆賊降叛十等各以類附其中又參用史漢將相名臣百官公

卿二表年經人緯例書本事記於帝王格內其后妃已下則於其拜罷

及所有事之年著之而終言其竟更刺取歷代古史別史雜史偽史載

記編年紀事本末說部金石傳注別集之說折中是非編爲攷證繫當

條後本用取便繙閱無敢著述初成數卷以呈崧師師謂條理不繆當

合川縣志卷之二 序傳上

遂成之且言吳勤惠所刻漢四史本漸就漫漶可藉校勘迺取正史編

年兩種逐更讐對一過撰自漢元年起明永曆十八年止帝各爲卷偏

問位同僭偽命曰通史人表附以目錄四十卷中分國姓師姓家姓譜

則國各爲卷序例一卷紀元韻目一卷引用書目一卷職官攷三卷都爲二百數十

卷其事蹟之駁異字句之乖違別爲二十四史校勘記八十卷通鑑校

勘記十四卷附胡注質疑一卷餘三國志音義歷朝履霜錄讀史平反

論未成書者尙不在中屬草略定家母有當歸之寄已亦白念八年在

外它无所於就廢然思返授徒里門雄長兒童雜居庸保無復有風雅

意何論此事然課程之暇時取披之或如逢其新或有加於舊或閤合

古人之說或間拾先正之遺輒憇憇然不忍自棄亡友周君宇仁名國

津戊子舉人著有五均徵文亦謂人表之作自是獨剗校勘記具有心

記天社山堂筆記等書待乘得不徒對本之功而攷表尤致精密彌爲難得可貴使所据本稍多當

不減阮氏十三經之記第阮旁羅昔今人說此必字皆已出猶嫌私而

未廣耳森楷承采其言始以錢趙諸說屨入字比句推疏漏殆少以家

貧親老無力庸賃鈔胥又營營衣食歲率十九故白丙戌已來屏棄舉

業專力爲此僅將人表起漢迄晉六十四卷補訂完備校勘記亦祇寫得四葉清本史記十卷漢書十六卷三葉後漢書十卷三國志六卷其晉書已下刊本差希偏州寡士借讀亦艱向所乞索於省垣者又或遷徙以去坐此中廢良用憮然以知貧之困人固不獨在饗殮之奉朝夕之需已也竊惟漢司馬氏傷所箸之不成就極刑而無愠色猶曰可爲知者道難與俗人言若是乎人苟有可以自見則雖隱忍受辱爲鄉黨戮笑亦庸非知者所譏乎今森楷於史公誠無能爲役而所撰二書實覺內稍有得於已外或有裨於人璞寶帶言與史公恨私心有所不盡鄙沒世而文采不彰於後之意無異倘使育而成之其亦莪之類邪見所患者不過貧無書耳不過貧無書而欲向有書者借讀之耳非有韓子爵祿寵貴之求也卽冒昧干瀆之嫌亦未至如史公被僂蒙詢之甚也苟竟默默而已則是知之不得行之而不以告人幾何不爲眉山氏之所訶哉方今海內巨人能宏獎風教提倡後進者聞夫子大人及潘尙書傅最森楷於潘無素又云泥遠隔無道自達夫子則夙所師承又幸移節三楚距蜀密爾亟欲賣舟東下搥衣旌門一進而請所業以卒

成其志牽率內顧遲迴未果乃走省垣謁諸崧師乞代爲書先容借取史部各種書目別冊謂此爲逾恆之舉固宜道地而已亦不可以無言也庸敢獻書鈴轅盡傾蓄悻伏冀警照所借書目給力遞寄俾令安心纂訂無廢中道則三五年後此書有成卽當躬親攜還泥首鳴謝併請指政闕失俾臻完善蘄足信今傳後藉以爲知己者報至於書中自敘如涉揚調宜非對長者體然自道得力自宋宣城太守已有此失且較之東方生上皇帝書似猶孫攘度夫子大賢必不以此區區責也惟比年家累綦重不能違侍又書皆手寫更無副本呈誨希惟原恕裁幸不勝悚惶待命之至書去久不報事良已俄聞遵義黎庶昌先生觀察川東以文化爲己任宏獎後進不遺餘力則以歲試赴渝上書觀察曰蓋聞有非常之人然後有非常之事有非常之事然後有非常之功欲圖其功必先舉其事且必先得其人周公之七十士子賤之十一友介子之五十俊老用此道也而委瓌握齷拘文牽俗者流乃惟因循習故之爲凡成例所不有者舉色然以非常駭之烏虜此于人不可知而事功何有哉方今之事蓋莫棘于中外通商民教交涉矣前觀察公以不辦罷

豈獨見議于簿書期會間邪亦未得其人不能舉其事故也夫其人者
詎必夸說毗詞奇技淫巧以與傲夷爭一日之長者哉唯其沈幾觀變謀
足以定之而已矣顧其人在前世或曳裾侯門或廁身食客或自請處
于囊中或願參陪于末座類皆足以自見而生今之時則上書建白有
禁懷刺干謁有誚雖抱阿衡之志懷仲淹之憂道奚由進然果在上之
人皆爲風塵俗吏循墨自封之流不思厥職則欲發口談當世事誠就
方鑿而圓之柄無益祇取辱焉若其上礪落英多憂切時事則雖一時
明有所遺未能卽禮致之而其人激昂慷慨抑塞不平之氣終必不能
過自遏抑竟無所見蓋孟子云憂以天下又云是何足與言仁義則不
敬莫大乎是其素所蓄積然也大人以不世之才膺至劇之任當下車
伊始中外士民固已切切焉望之以其事而責之以其功矣意者龔遂
之任渤海張綱之治廣陵吳公之守河南王允之牧豫州其卽大人昨
日事乎迺經今兩月文告屢逮而梅免張嬰之徒未有所改革賈誼荀
爽孔融之等亦未聞獲見禮于門下將不急其事而無所事于其人與
抑亦將有事焉而猶未得其人與無事其人則已如猶未得其人則如

合川縣志卷六十二 序傳上

三

森楷者賦性蠢愚守己狷狹卽不能于其人爲役而嘗關覽古今鉤攷

載籍箸爲通史人表二十四史校勘記二書爲諸先生長者謬相許可

雖未必誠體大思精伍崧師評語不朽之業朱學使評語而位置于陳景雲梁玉

繩錢大昕王念孫之間固無愧色以較攷證附齊召南等撰商權王鳴等

作似又過之則使不通世用猶當警之犀象珠玉無補饑寒而不可使

在泥塗中矧于熟觀興替稍識事機或不無一言一事收效于鉛刀之

割邪郭生有言請自隗始如不惜階前盈尺之地召而觀之則庶幾其

人之招亦駿馬之骨之類也昔韓愈氏與于襄陽書以相須相遇爲言

而惟朝夕芻米僕賃之資是急蓋其義甚高而其情孔迫矣今森楷竊

慕其義而尙能忍其情惟大人裁察焉若謂貴賤異等古今異宜躍治

爲不祥之金銜驚非自重之寶則是格之以恆法而非所望于非常者

也大人當不出此謹以奉聞伏冀垂照不備書上之次日觀察遣使請

往見並以所著書進詳詢所爲著書之意及見所居狀況森楷爲詳陳

之大畧如書指觀察慨然曰是予之任也夫子莅川東十閱月見東人

士百數有胸襟有志力不同流俗者唯足下一人耳今偃蹇若此不有

振拔之何讀書作官爲遽命入其幕專事所箸書歲奉二百金爲膏火費而不責其它森楷遂往依之旋迎母就養于重慶時光緒十八年也其秋匪劫州之龍洞沱場日報登載頗及州政腐敗狀觀察心憂之會鎮番張熙穀自南江來知州事有良吏名觀察欲及其新到告以利弊使適宜興革因與森楷語及森楷退而條陳其事曰爲通籌本州利弊分條逐細陳明懇查賞飭定章用期補益久遠事竊聞思不出位莊生戒越俎之謀道在因時孔子貴律天之學苟隱情而惜已有類寒蟬何救敝而補偏遂成治象况在上方不遺葑菲而于中久欲獻曝芹非逐事以爲言將失人而不智用陳鄙臆惟懇狂愚伏查州境高据渝夔古鄰巴濮漸涵濡于累代經過化者數公固昔日之攸聞忽流風其頓謝元燈莫繼三空乙榜之名魁宿何存全昧西山之籍鑿秋賦者十惟四五戰春明者一黜再三馴至童子之軍秀才之等猶疏疏如舊雨祇落落若晨星學荒而並昧人情道廢則專趨世俗文章假我亦名濫吾儒尤物移人遂情鍾彼美縱談風月何人抗移榻之高痼疾烟霞比戶炫傳燈之祕試問民間疾苦末爲父老心關頗同水上浮漚至聽官奴

驅使破私囊而還惜虧公帑所從由以至六政之規條半歸湮沒八局之款項多被挪移因而當舉之端若興學田修文廟已行之事如幫義卷助賓興舉辦難期拮据已甚強相酬應無望恢張葢如剜肉醫瘡絕非得心應手至于上司所派撥公事之移提向靡章程多從規避殊乏豐亨之象奚詢教育之方設有非常初無豫備弗能運掌可爲寒心然或毛舉陳言或指攻積弊措詞少激則不免官幕之譙呵籌款猶虛又適成書生之議論蔣太史稟經督府差就清釐張州同控至道轅稍從改革卒多窒礙仍復因循遂莫獻乎芻蕘祇空懷其葵藿生等蓬心自愧蒿目同傷竊代表乎羣情勉自攄其一得通籌事勢未敢爲畸輕畸重之詞實扶情形不肯作半吐半吞之語以除弊者興利非責巧婦無米之炊卽轉敗而爲功適合桓公染繒之義如堪施用請核奪而勒示于貞珉毋事吹求懇查察而飭先乎正簿庶昭當世並垂方來或幸通行尤爲公便一學田宜仿辦也此事前二十年南川已辦行之張學使輔軒語中亟傅南川令黃君之賢能及其士民之好義知本而敬之獎之以爲通省百五十州縣勸葢謂人民以諸生爲翹楚地方以讀書人

爲元氣養士之道無先于此也曩年華劍葑牧吾州時有以此說進者因巨款無籌而止今歲學使按試重屬示諭勸辦學田廩生伍凌漢等集眾籌議迄無成言愚意學田之舉他邑尙可緩圖吾州則難姑待往年猶非急務今日則難苟安何者州于郡屬號稱中上故津捐之數取進之額皆較鄰邑爲多而自光緒以來童軍僅止千人上下今歲院試又小半之比之咸同之間十減五六豈獨州人之不悅學哉亦由新進謁師校論摯敬比例豐腆動必取盈嘗有一朝遊庠而毀家大半負累終身者承學之士見其如此以爲讀書無益奉摯尤難荒廢頽唐莫或進取非辦學田以誘掖之竊恐間世而後蠻野相沿將遂不聞絃誦聲矣而願欲其人文蔚起比隆前代奚可得哉現聞鄰封銅安定涪各縣興辦學田皆照募捐章程計糧攤派分年徵收卒著成效吾州似可仿而行之又聞州中前有好義之士頗見及此遺囑厥子令三分其家以一分爲此事其子敬承父志願與實行加以贊成當卽成事卽皆不能辦到吾邑文武歲科兩試得摯不過三千金而填冊解卷旅費雜用等項皆出其中除淨分攤大約一齋年可得四百金今欲爲籌千金之款

其詳見下舉凡書斗口食諸生認號轉案幫增補廩出貢舉優報丁起復一切雜費悉取給于此不復更向諸生苛求庶使師生無唇舌之煩有講習之樂斯文風可蒸蒸日上乎一義卷宜永幫也州中初無義卷名目前道光中三費局支款有餘無所安置議暫買送州試卷一次後遂沿以爲例不可復停官府更以幕修棚費附之亦不能拒三費弗濟轉挪別局剝肉醫瘡歷僅敷衍光緒初年前州費牧挪用酉陽州寄存棚費銀無著囑令局士代填于是重虛其虛諸局皆以坐困往年孫牧莅任查知此情始令特設義卷局界畫分明不相溷廁復諭三河公所及小沔溪秤釐各提幫費用相仗助事方有緒孫丁憂歸遂置不辦仍暫取給朝不保夕何久遠云愚意義卷之設本以嘉惠士林何有但送州試不及府院鄉試之理推原其故實以局非法定又無的款因而虛應故事如俗所說潦州塞責焉耳今欲定立義卷局通送州府院試及鄉舉卷並舊所傳坐號費等項自原有數目外約尙需錢七八百緡特更爲籌歲獲千緡之款其款詳下俾令措置裕如一不掣肘試畢尙有贏餘隨時歸入培文局孳息使獲利子不致虛糜一賓興宜加厚也此局始自道

光年間就三費局餘款置買鄉田街房歲獲四五百金積至三年足供本州鄉試文武生監二百餘人給四兩會試公車數人給六十金之用中遭侵蝕冒濫加以恩科踵行入不敷出舉責以應負累滋深董首顛預更借倉穀千石以附益之穀價連貴倍蓰難償前州牧費始集州人籌議決定買田之家每價銀一千兩捐錢二緡名爲契捐又設南北市銀土官牟論令商民用銀或買賣烟土均由官平平過按錠按兩抽取平錢有差名爲資斧官平以爲彌補賓興之計約此二項歲當千金有餘合以原有錢穀各租儘可三年還楚卽有陸續支銷亦應六年而止乃設契捐官平以後統交原首筭理迄今十有三歲計不下兩萬金昨報下屆首人故匿帳簿不現揚併一無餘存猶欠倉穀四百餘石輿論駭譁紛請核實前州趙牧諭以事屬既往不必深求甚且又斥駁之輿論不服將興大訟愚以該首素號殷實雖或偶爾挪移未必侵蝕入已觀于所短一百餘金係屬失察司事之過其明證也特聞州中官私陋規多半取給各局而賓興尤甚所爲擁金巨萬償責不盡者弊正坐此如必澈底清釐則于前後諸任皆感不便故當路者從而袒護之

耳然非事之宜也蓋吹毛索瘢固異忠厚之道而熟視弊混不一譙訶任聽展轉虧挪豈不剝蝕至盡且恐芘護益甚攻擊愈滋乃至激成大獄之端尤于該局事務有害今擬請自該首明虧應賠外其餘皆弗深究第飭令將十餘年中應酬官府陋規若干挪填他局公項若干合盤托出開載明白以便劃段清釐各歸各款不使累及此項則此項積存三歲當有五六千金卽如巴州秋闈人給十金春闈人給二百金不難否則界限弗清虧累無已雖仍舊貫且苦拮据何加厚之有焉惟當事者一厲行之或慮稅契有盈虛官平有衰旺恩科連歲積蓄且空未必果能盡如所畫則于無科之年盡以所獲歸局孳息生生不已積少成多正無虞弗給也一書院宜變通也州設合宗瑞山兩書院皆以州官主政延請舉貢訓課時藝月臨攷校以試驗之曩有合陽課藝之刻州人士登科第者強半出于其中亦盛會也所惜時藝之外若性理經濟攷据詞章詩古楷法一不之及以故觀場而後通人之業懵無聞焉又兩院皆生童雜居曾未專設生員肄業之地旣無以見優異而膏火寡薄復不足以自贍于是生員住院歲不多人樸者株守寒氈黠者鑽營

公事人才奚以古若世風奚不日下也今欲兩院官師文課略皆如舊而惟改以瑞山專住童生不限額數月添堂課面課一次共獎錢二百緡以合宗專住生員官于二月甄別時錄取五十名爲住院生人給膏火錢月三千文令于性理經濟攷据詞章四門各就性之所近自占一科其時藝詩古楷法則兼習之立爲日課逐按稽核月各堂課面課二次共獎錢六百緡分別勤惰藉示勸懲務令奮志之士歲計所入與處館等庶幾心不外鶩學皆有成或生員不能住院童生自請住院仍願分科劄記者聽但不給予膏火用示限制如住院生有作奸犯科攬訟吸烟等事監院查明會商掌教懸牌開除准以住院之童生或院外應課之生員頂補其掌教之人不拘本土客籍務擇學粹品端眾所信服者由官訂聘仍于舊額修脯而外加送夫馬茶點筆墨等錢共二百緡用昭慎重通計上項歲須錢壹萬緡擬爲籌足其數按月開支一無留阻別更籌錢二千緡爲購置圖籍襍志日報之用後須隨時添補應候培文局年終結算贏餘幾何酌量撥提此不豫定此最鼓舞人才之要道班孟堅氏所謂博士爲利祿之途所從出者以此凡爲政者致

宜留意者也一文風官全培也風水之說智士弗道謂其舍昭昭之人而責之冥冥之地理近似愚者之所爲也然果行事無失而忽變故沓來非思議所能及亦並非修省所能挽則世俗輒歸于風水雖智者不能爲解矣觀于周禮著大遷之命孟子有變置社稷之說卽非爲風水計要亦新民耳目之一道也吾州自明已來科甲蔚起而近二百年間入詞林者只蔣編修一人又未有所成就而殞甲乙之榜雖亦有人而率降年不永所中之數不及所亡之多從未有進舉兩科一時並存十餘人者今則三科報罷孝廉僅餘五人眞落落晨星不啻矣談者無所解免僉以文昌之宿有司祿司命二星實爲貴相貴將之神州文昌宮地勢狹隘雖近依孔庭山向迥異且在水際漫衍之區氣散不聚旁豎奎閣適成火形與宮位相剋最爲官祿大忌隔江學士山舊建八角亭體製崇麗與治城南津白塔配作心字今就圯廢亦于科名不利廣文衙署逼鄰倡樓塵雜喧囂旣非體制又以其故外門不能開拓表狹裏闕有如魚笱尤非吉相以風水論當改建文昌宮別豎奎閣培修八角亭大開學署門道斯于地理相宜乃客歲五月奎閣傾頽眾議折去

延今始與八角亭並籌興修而文廟學署則終弗敢議及非必見不到此實以籌款固不易也今計二項所需約在萬金以上以三年攤之不過歲五千金儼爲籌足其款刻日興工計期告竣庶幾神罔時怨人得所安土有騰達之期而無橫折之患矣一公費宜明增也公費者何陋規是也方今大小官吏履任均以裁革陋規搜剔積弊爲先而顧明目張膽議增公費豈時宜哉然愚以爲王道必本人情往年丁文誠公勅興官運備爲道府各官籌添公費詎欲以利餌之蓋旣裁其節壽款目自不得不量予以辦公之資勢固當出於此非僅杜當陽王威甯意也州中初興各局原皆自足敷用中遭官吏提撥紳董挪移或以公事而代支或以私情而暫假或因窮員抽豐轉爲告幫或爲大府辦差暗令填補或中外勾結應酬餽贈之儀或水陸往來讌會犒賞之數皆取諸局不問所由其始未能抗顏校爭其後乃遂按圖求索纍纍無已源源而來各款虧虛弊皆坐此乃至育嬰局之堂內小兒恤養所之院中節婦皆實無其事而官使報之以便奏銷不知其錢竟作何用蓋有不能究詰不可名言者矣今若逐局按別昌言裁革當途固無如何而正款

之餘一無借手旣恐諸多不便或值墨吏硬相指索局士無力抗拒終仍勉強奉承盡復厥初或逾其舊均不可知是除弊適以滋弊也不如就各局中革其陋規之尤不堪者留其尙可明言之事及爲地方應辦無從措備之端逐件開列約定數目卽在孳息款下提錢若干作爲公費隨宜開支不得復向各局波累亦不得于額定之外別立名色勒索巧取凡以州中公費第有如許而已亦塞漏卮之一道也一匪患宜預防也州境士習詩書農安耕鑿初未聞有匪患同光之際東里富戶華直方家始遭匪劫頗駭耳目未久卽被捕獲伏誅漏網無幾人人引爲炯戒無敢復蹈前車間有痞棍流氓呼朋引類勾誘年少說詐鄉愚其技亦僅止此而已不能爲大患也直至去年省垣會匪王某來州日遊娼賭場中一無事事未幾卽有痞匪多人白晝嘯聚搶劫龍洞沱場戲會一事當獲夥黨供指王某爲主旋在城內捕得王某並于寓所起出刀械洋槍火藥鉛彈等物因子笞囚治罪如例則是此輩之意正不可量未宜視爲疥癬之疾聽其自生自滅而已苟不先事預防竊恐日引月長不至如萑苻之盜非盡殺不止也擬請扎飭州官嚴密訪查得有

匪等姓名年貌居址行事並外來者之名籍綽號詳細開載懸牌曉諭俾知其人其事皆在洞鑒之中並歸訪挈之內特開一線生路准其改過自新如于牌示後三月內自覓公正妥保聲明從前失足以後更不入會出具改悔切結即于牌內除名徐觀後效否則照例捕挈盡法懲辦或有逃逸即一面緝捕一面逐出境外非被獲案不許潛來庶匪患可少息也一保甲宜連坐也保甲之法起于荆公推原其先乃出周禮比閭族黨之遺而管子變化之商君繼續之更加以連坐法當時亦頗嫌其酷烈然欲清盜源絕匪跡舍此固無由也州中咸同之交原有團練自滇匪靖後乃有團而不練之說後并團亦罷之而專辦保甲以爲清查戶口編填門牌即保甲之能事畢矣不知此但保甲之形式非保甲之精神保甲之精神惟在實行連坐耳不連坐則戶口有無遺漏此門牌上所注之人數是否真實或爲虛誣其間有無匪人混跡其中皆不可知即明知之而未嘗責其舉發即亦瞻顧情面相爲容忍則直前有亂臣而不見後有賊子而不知矣雖日言保甲奚益哉擬請札飭州官實行編聯保甲所有戶主姓名居住職業尊卑親屬男女雇傭田土

租息逐一載明不許隨便捏報示定清查竣後幾日前往抽查點驗查見有人數不符填寫不合即以捏報論酌量罰辦以儆其餘至于十家門牌家家均係善良亦當互相保證說明此十家委無盜匪奸人如有盜匪奸人一家發見九家連坐同一之罪用示威嚴或十家內有一二家不妥一家內有一二人不妥此外數家均不承認簽押仍限于幾日之內移家出牌另行補造照加牌印若不辨別清楚遂行簽押將來牌內或有一家一人發見匪案或被訪問均將簽押之家報官治以連坐之罪用昭儆戒斯僉壬無可托足即保甲有實用矣以上八條皆合州見在應辦之事有須款者亦有不須款者而以須款者爲多若不爲籌的款雖欲辦惡從辦乎今將可籌之款逐一舉之一鹽課宜改撥也州境向係鹽商計岸私梟競賣店丁鬥爭每釀命案爲地方累嘉慶道光之間人交苦之傳聞上游各縣有請革去商店歸課入丁之舉援案請亦作爲歸丁州縣因已定案不行勢不得已乃以五里公意虛捏永來興明記之名假充商號承頂舊商請引行銷形式與店無異實則在三費局內撥出田租六百石代完每歲額解水陸引課銀兩設局派紳管理名

之曰鹽課局咸豐初元乃由李署州牧稟請定案由是商害永除人皆
僂便管理鹽課局士亦復得人一年除完解外積有贏餘陸續添置田
租三百餘石穀價略貴即可獲銀三四千兩應用有餘藉資彌補各局
虧挪及一切無名規費號僂優饒及光緒初鹽歸官運引章奉憲白截
穀價轉賤局款不敷正供始派民間隨糧攤補多寡不等弊竇滋生經
張正常控前川東道唐札委徐牧審斷首換局士以平眾怒已仍派局
歲任課額千金餘歸民間補足但恐鹽課名色爲人指目爰改名爲課
田而併其局于三費即令三費局士兼管不更派首董理徐牧去任隨
有不肖鑽營復設鹽課局士如舊見查該局歲租九百餘石課釐僅占
三分之一餘皆未作正用而還派之民間則與其徒擁虛名不如改歸
實濟擬請飭廢鹽課局盡以課釐額數攤入丁糧項下附上約計正糧
一兩不過攤銀二錢爲數無幾負擔尙輕盡撥歲租另立一培文局並
將原有書院賓興義卷各局併入其中以期事權歸一亦省糜費所有
上請興辦各件即責該局一手經理免致彼此推諉窒礙滋生約計豐
歉平均此局一年可出銀二千餘兩一烟館宜抽釐也烟館之設聚匪

人消贓物壞子弟敗市風害馬亂羣莫此爲甚法當禁革以清肆塵而
自同治以後每司牧到任輒出示革除旋爲各烟館斂錢行賕請託關
說而止至衙役之訛詐汛丁之應酬一年率三四舉勿憚夫豈其愚頑
之甚哉誠以商賈之利難及什三而重需資本烟館之利多逾什五而
少費母錢所以愈禁愈多愈濫以州城之斗大而烟館至二三千
家鄉場市鎮腰店廟宇碗廠炭窰等處無地無之其提籃進店攜具上
船無可稽核者尙不在中由是而推竊恐數十年後不至戶胥烟戶民
胥烟民不止上年太尊王公深鑒此弊亟示嚴禁方有端緒而謠言四
起中止不行則誠積重勢成雖大人先生之力亦有不勝駭奪者矣然
竟坐視流行不爲設法消弭是將載胥及溺非爲政之道也今擬竊取
周官害者使亡之意參用廖養泉觀察治海州張孝達尙書治湖北重
困烟館成法特抽烟館釐金當未抽釐之先預飭能幹書役三十人分
投密查城鄉大小烟館實數並造街坊團甲招主姓名年貌清冊呈核
不准漏洩風聲致生流弊復令團保依照查呈之冊復查核報籍知有
無漏遺然後傳集烟館諭以烟館原非正業又多雜居散處常有停留

匪徒引誘良民等弊因爲流痞蠹役訛索滋擾之端本當刑禁勢格不予留餘猶恐若輩多人一旦失業諸多不便現擬章程勒令每烟館十家量留三家或合或停聽其自便但須移居一處都在正街柵內不得仍前隨處私設弊混滋多定取每家每月各釐金錢壹千一百文以一千文歸入培文局以一百作團保代收經費月小不減遇閏照加團保得于烟館開市之先責成招主先繳釐金一月以後逐月預收隨時彙送並于佃約內注明釐金不清押佃照扣庶無失誤其無牌私館及提籃攜具者准予挈辦或有不法棍役仍前搥索許其稟官究治藉示保護既開館後卽就現有烟館造册立案此外不許私增一家如有歇業之家應令報局照准其所應上釐金之數仍令同街烟館公同攤繳勿許藉詞推諉十年之後公款饒裕再議減裁如此行之則州屬七千烟館可留二千當抽釐錢二萬餘貫卽僅得半亦可獲錢一萬餘貫實合銀八九千兩一戲劇宜開權也戲劇初起蓋本古人謠舞樂神遺意初未有權之者而州人富鮮由禮于諸應爲之事多藉無款爲辭不肯舉辦獨至演戲一節夸多門靡恥不若人嘗有一戲賞至三五十金雖藉

口娛神與乾沒有聞亦太失之靡矣况其家居行樂宴客逞豪費日愒時誨淫媒盜尤爲作無益害有益又失之甚者也今欲靡者使微而轉化其無益爲有益則莫如就戲劇而重權之曩遊成都金堂見其權戲劇法凡原在縣及新來之戲班皆令其往禮房報名註冊給以臺口印字紅帖若干張貼上開明演戲一日取官帖錢六百文每日一換不許重用重用者爲弊混加五倍罰不用者爲抗漏加十倍罰無論公私人神一律抽取其錢責令戲班照繳繳後乃准開演不問僱演之人免生瞻徇等弊仍令差役一人隨官帖往監之飯食由戲班供給彙總六千則一歸照繳以一千文爲書役紙札旅費之用以五千文歸公繳畢復隨往監戲畢而止未用之帖由差歸還行未十年頗著成效吾州幅員較廣市場亦較富庶演戲自當較多仿照開權而改其官帖數爲每日二千文當可歲獲二千金以上此雖爲數不大而比之勸募富紳集事爲易且取之于作樂之人不失與眾樂樂之意此可試行者也一廟會宜勸捐也越巒楚鬼在昔已然州人尤有巫風好爲非類禱祭琳宮紺宇相望如林廟莊僧田所在多有紳糧又別醵金爲會藉用禮神款有

專施不作它用子母孳息浸以滋豐大者買田取租次亦積存成款雖受非鬼之誚尙收得人之功一再傳後寺僧不盡能賢會裔不皆體德往往坐擁厚資漸爲非禮浪敗侵虧之案層見疊出雖經官府斷結旋仍據爲已有外人不得過問其差黠者乃稍出餘資爲修廟辦會及地方小善等用以便報銷且塞口語然固百中一二且亦實濟者少糜費者多于大局絲毫無補益也而商賈之幫莊工匠之行底不關公眾者更無論矣曩歲巴州余蔚齋主事興辦學田義卷賓興等項純取給于裁燈田分神會二款勞怨數稔卒告成功今若依式仿行竊恐地望不同莫肯犯此大難礙但改爲勸捐請先論飭幹事書役一二十人分投密查城鄉廟宇若干燈田幾何神會凡幾會項多少並其寺僧首人名氏造呈清冊備核如果一無遺落准將各該書役存記提獎以資鼓勵後乃分別僧首單傳帖請諭以上項當興之事皆所應爲而文昌宮尤祀典所關不能更緩勸令該僧首激發天良按照清冊之數或田或銀自行書捐大致最少以十分之二爲限至多亦不能過五成勒限六箇月間如數查繳後不再捐其寺田租不及二十石會金不滿一百千者

應予豁免不在此論或有抗違疲玩立予提案追究用儆效尤果能辦到則此二款可得三四萬金以作基金歲息可得三四千金以辦上項諸事當不至拮据矣至于近日鄉里俗人于春三夏六秋九各月集眾斂錢作爲彩仗導引萬歲聖牌往朝華銀龍多東山遂甯等處廟神名爲駕香舉國若狂莫可告諭旣藝體製亦耗貲財長此安窮且釀他患理在應禁之列若以習俗不免明禁難施應請札飭合州責令駕香會首每駕出錢百千入培文局乃許前往雖事未必眞辦得到而巫鬼之風或可少止亦正俗之一道也一闕款宜孳息也局各有款款各供用何閒款之有然查攷州中向所設局自月支諸項外若義卷賓興等款皆係臨事乃給餘時並爲閒款又今所籌撥款目必俟徵收一年試辦有效乃後舉行所當興事則此一年之內進款匪細不有以安置之不特慮爲不肖垂涎思相侵蝕而積款待用引日方長卽其所失孳息子金亦不可訾計矣今擬仿瀘州體仁堂放錢法子培文局收錢足有二千緡時卽將其錢出借每錢千文收月息錢二十勒限每十日還三之一本息並繳一月繳清其法卽在局中設立流水號簿照依千字文字

數逐次編聯日各一字自爲首尾借券亦卽依其字號刊板留空按數照填用培文局圖書印于票號騎縫中間用防詐僞錢數自一千文起至十千文止借本之人縱極可信亦須自覓擬認耽還殷實妥保一同來局當面簽押方許借給借後自按定期親送還局守將借券眼同批明月終揭券並簿注銷如欲再借別更立券一同前式或有狡賴惟保是問扶同延宕送署請追以後本人保人均各存記不准再借將來款項大集城中礙難全借儘可邀請各場紳首取具該處里正鄉總連環保結設立代借分店照給印券一切如式唯設循環號簿二本令于月終帶循字簿到局結帳繳息留環字簿存店書注日生下月交捐如之局中查核息帳無誤卽于繳息項下酌提什一以酬勞費或由分店自行算明坐扣以省往返累贅亦爲簡便如有故意拖欠情同阻撓分店陳明情形由局查實不繆應予協稟請究以重公項此最剔除中飽涓滴歸公之道當勿憚煩而畏行之或疑月息什二未免過當不知近日豪強兼并之家所立小押六關上錢等店有取什三什四之息先在本內扣除者按期關錢人無爽信則緣銀錢緊急城鄉小民無本貿易綦

多渠得此錢遂可藉以生活月息尙非所難與其聽彼重利以肥己曷若由此輕利以益公且仍以爲吾民辦事之爲愈也是在爲上者勿聽謠言斷而主之而已綜計此款年可獲銀三四千兩以上五條皆合州見在可籌之款有改舊者有翻新者多寡不等要以辦上八條之事恢乎有餘裕矣然無規則以善其後亦名是實非同歸于無益耳今更爲條列焉一年例宜昭垂也州局初設立時所有事例皆必每年清理有條不紊確可遵依今乃出厥範圍彼此挪動馴至大壞不可收拾者豈獨經理之不善哉或其立案刊碑之時雖有規程條例而未必以年爲限著令年清年款也觀于各局皆病獨三費無恙則以三費章程旣立碑于局又刊書傳播非甚不肖猶不敢含混加多斯得至今存耳矧增學田公費之目廣義卷賓興之費變書院鹽課之條皆新所議行不有以昭垂之再數十年安知不復就湮沒仍供若輩之擄擄也計惟飭將新舊各局田土若干在何里甲佃戶幾家各取押佃銀錢幾何例收田房穀租乾租凡幾是否額定抑有讓減每年有何開支計須銀錢多少逐一明白開載通稟各憲立案聲明立案之後永不准于此內加押短

租亦不准于此外動支分秒雖以官力非法提取抗違勿憚既伐石勒記于其局仍筆之于書刻印傳播展轉分散期令各局情形真能家喻戶曉一有不合人人皆得起而攻之斯年例有常不至人亡政熄矣此外祇津捐一項歲有變動弊竇孔多殊非年例所畫一諭悉張孝達尙書在兩湖總督任內定有民間完納丁糧簡明清單作爲表式飭令各屬勒令各知縣于開徵時按格填注懸示縣門有逾表列之數分釐者作爲淨收無論官吏軍民皆許指控以憑究辦一時弊絕風清民大僂便敢請轉飭合州仿而行之亦昭垂年例之又一道也一局士勿久踞也久道化成聖人所以爲治而茲顧不取其久則以局士雖由選派實多出自營求世斷未有患得患失之人能具不磷不淄之志者而任聽其蟠踞要津麾之不去其不爲局之蠹幾何哉此蔣太史所以有此局滿則謀彼局前官去又媚後官之刺而亟欲令局士一年一換以成維新之政也惜其議方准行勿勿北上未及決定規條遽爾老成凋謝凌遲至于今日乃有筦逾六屆權兼四局者夫何怪于局款之日虧矣今既一新局制應將現在局士酌留管有成績未被控告者數人爲各局會

辦其餘概予更易不問曾否屆期別更仿照銅梁縣事例先就舉貢大紳及田租千石已上之糧戶選出八人爲各局總辦不指局名亦不必常川到局祇每年開局日到局提議及每月初二算月帳日到局監算各局進出流水與各會辦分投辦理事畢各歸或願常川住局者聽如帳不實不盡爲人指摘有據應與各局董理分負責任毋得支推所有夫馬茶點每人月給三金在公費項下支取其人每年更易一半二年更盡以後逐年如之次就廩增附生補進名次不論貧富及二百石穀以上之監生職員農工商人各就現有之局各派一人爲董理均不指定何局統于報交之日公同到局闔拈用免自擇便利之弊有不願者卽以名次在後之人頂補不必別舉自代應有夫馬火食一切仍舊弗關公費其人均一年一更不准藉詞留戀致礙後來之路或謂用人如此將同機械作用豈有立賢之意不知年例昭垂諸有制限一櫃工司事少識事體卽能了之而必藉重局士者取其監督守護坐鎮雅俗無令局事動搖而已非如開物成務必世後仁故甯失之拘不欲少濫也至櫃工司事本須熟手亦恐日久弊生或成尾大不掉亦應與年俱去

庶免換官不換幕之譏惟有能力無過失者可由董理妥商量留不爲限定一局體無輕褻也局爲全州辦公之所兼有津捐票根保甲牌冊在內理應尊嚴鄭重方不褻越貽譏先年老輩頗知自愛一經入局皆必規行矩步無肯蕩檢踰閑所有賭館娼寮初無局士之迹卽偶不自檢束亦率避言避色未聞過市招搖近因不肖鑽營正士無幾羊質虎皮漸忘貴重往往句串書役結交門丁飲酒衙蠹之家聽譟蕩婦之室任相爾汝無復威儀甚乃徧召倡優來局搬演雜劇肆筵爲滿一巷皆空顛倒衣裳交錯履舄視瞻大駭物議滋譁至于走狗賤人公然分庭抗禮或且移樽應酬于是局體埽地盡矣本年有因此事相與稟聞官府不察轉予駁斥鼠輩無忌益更鴟張勢將化辦公事之場爲治遊之地言之可嘆識者用憂今擬相與申明體制已後局中非有大事不准張筵他人私自延賓不准動行借地一應優伶妓女賭博器具概不許進局門官遣丁僕至局准到客坐一茶但不升坐炕牀有褻官位其快捕總撥差役祇許在客座門外立述所由不准動輒坐談仍請官示懸牌永爲禁令庶幾流品分明人乃不敢以局爲戲矣以上三條係將來

合川縣志卷六十一 序傳上

三

善後事宜欲維持州局于不敝者舍此末由惟留意焉條陳旣上觀察擊節嘆賞以爲言皆有物事可實行不特能讀書且留心經務有用才也亟飭下州厲行之州官謹奉令又訪諸輿論僉以爲然卽撤換局士之尤無狀者數人悉代以正紳局事大理並有餘饒後因置學田廣義卷加資斧如所陳惟未及設培文局及變通書院則時遼事異熙穀及森楷皆不在州矣惜哉十九年癸巳恩科森楷舉于鄉當北上應得新增資斧三百金局士爲森楷言局務粗就緒而自辛卯至今三年兩科已重虛其虛明後二年又兩鄉試一會試是爲五年五科需資斧尤鉅局力豈能支必按籍而取盈非舉債卽加押耳我其如局何君又將如局何森楷知其意爲正告之曰賓興之加自鄉試始會試詎得有異議我若猶諸生必當爲公車爭以歸一致今獨幸忝竊無同舉者雖計偕尙有數君而不決之彼獨以論森楷殆以森楷爲提議人乎果若是則損私益公得其半足矣未知王丁莫易諸君究何如也旣並依森楷言定北上資斧爲百五十金後遂爲例甲午在都以人表校勘記兩書例言付石印徧謁當世學者盛煜繆荃孫王懿榮李慈銘蒯光典康有爲

諸人請求謔正頗有磋商試罷出京更訪俞樾于蘇州陸心源于湖州
丁丙丁立誠于杭州見王韜袁祖惠汪康年羅振玉章鈺于上海出所
業就教得商榷亦如之至九月杪歸最其先後賡牘爲師友贈言錄實
之人表卷首非欲標榜識教益也二十五年廿四史校勘記成明年通
史人表成見者謂其足爲整齊故事是正文字之一家學森楷顧念此
特攷訂之文具非有事實之師資雖尙匪空談要無關實用以此爲盡
史學小視史學矣因欲自就寢饋所得分別義類輯爲帝鑑相鑑將鑑
吏鑑士鑑女鑑命曰通史六鑑以爲君相將吏士女之僭鏡所謂我欲
托之空言不如見諸行事之深切著明者特其事體彙重慮匪孤孑之
人中年以後所能尅期奏功則爲儼修通史六鑑序例并求友引曰方
今中外大通耳目日異趨時之士動言維新微特術數技藝之能機械
工巧之長必新法是尙卽帝道相德將畧吏治士術女學亦皆事事求
新若自三古以還無一足矜式者守舊諸儒奮起爭之謂其見異思遷
事不師古誠僞錯滅裂之尤而還叩其古之可師者安在則自一二經
生常談子家孤證而外率不能畢其詞間援史事以證亦僅毛舉皮傳

合川縣志卷六十一 序傳上

三

苦難貫串賅洽本末粲然卒爲新學所誦而止則非徒經學子學不明
之過而史學不明之過也何者治世之道譬治獄然經猶法律子猶事
例史則其成案也三千年來人事日新舉凡怪怪奇奇世俗所詫爲未
見未聞者莫不畢具於史其間或中或否卽史而詳推之又莫不與經
子之是非相脗合則據經子以證史卽依律例而附成案之道也人而
學斷斯獄安得取經子而舍史哉雖然史之與經子離也久矣自尙書
既沒春秋又絕微言大誼歷世渺傳獨漢太史公書貫穿古今網羅物
理擇言取義必本聖人諒爲千秋得失之林不爲一人一家一時一事
而作班陳繼起斷代爲書弗相會通規模遂狹特其序君臣之中失述
士女之媿惡詞尙體要考鏡攸資猶不失爲經子之遺斐然稱良史焉
范沈而降斯道益湮唐宋諸人專攻文字非屑屑詞章之末卽斷斷字
句之間以致質不勝文不乃詞不達意卽如本紀例載詔令而不辨其
誠僞是否雷同疊架浮濫殊多或遂盡汰其詞直載戎禮除目畧似斷
爛朝報初不顯其行事規爲復不傳其言論風采王者效法於何取裁
此帝紀之弊一也將相大臣法得專傳必以勸戒爲義自可美惡同論

而不挾聖乘經往往去取失當馴至朝官仕履之外惟賸空文間帥征戰之餘了無奇策更薰蕕之其器尤殺雜而不分援古證今借鏡烏在此列傳之弊二也若夫吏道多術各有專長文學同科自分門戶卽列女之無異亦才德之攸殊而顧影響函胡不立類例錄循良則簿書徒具言教養則功狀或虛綜術業於儒林而不別其治經宗派講學淵源甄品類於文苑而不詳其妙理高文清詞麗句宮闈以朝代次則並列貞哀閨閣以節義登則不著嬖寵旣無當於謹嚴之誼又不足於懲勸之規混聚空勞冒易莫辨此循良文學后妃列女等類傳之弊三也有此三弊史蓋無足觀矣况重之以諸志之重複諸表之外錯益謬鑿而不可詰哉近世通經之彥盛推資治通鑑一書而罕致力全史者正以此耳夫豈徒謂史文繁重鑑書簡要而樂趨其易乎森楷從事乙部廿餘年矣竊於此中源流少有闕見旣撰廿四史校勘記三百二十卷通史人表二百四十八卷以是正其文字整齊其故事又撰其地理形勝沿革表職官勳爵進退表經籍藝文異同出入存佚表暨人表姓目四編紀元韻譜四編各數十百卷以卒就通史之學而附益之人事忽忽

強半僅成重念此皆非史之用亦非有經子之義也慨然欲就通鑑編年之事用史記紀傳之文而一取其義於經子非經子義者屏弗進發凡起例爲帝鑑相鑑將鑑吏鑑士鑑女鑑都命之曰通史六鑑別仿通鑑目錄之制略依經子義例別類分門逐條隸事而詳注本書年卷於各當條下爲目錄若干卷俾自帝者而下爲相爲將爲士爲女或有不辦之事茫若無可据依皆得按索此書如向故府而檢成案不至若向者讀史渺乎無津涯焉其庶收師古之效而不大貽新黨嗤乎然而斯事體大非可略循故紙偶得一知半解便許仰屋著書則必用宏取精而勿專倚手足之烈亦必思詳處審而難刻期歲月之間今森楷犬馬之年已四十有二甘心鷓伏無意飛鳴勢不能徼幸聞諸朝廷得以書局自隨辟召僚屬相與有成則使戢影杜門窮年矻矻亦不過如爽溱通志位置自高而獨學寡儔徒做精力終鮮菁華不副著作本意矧又飢驅奔走一歲伏案之功不能大半不幾頭白有期汗青無日而空嘆於有志未逮也與魏文帝云日月逝於上體貌衰於下每念此言未嘗不廢書三歎顧影而汲汲也旣思廣夏爲羣材所構大裘非一腋而成

與其專一已而無功何如呼將伯而其濟用是明爲序述并附例言繕呈諸大君子之前叩請閱正如其此書之作無資時用葺卽深加繩糾成亦乞矜其用心教所不及或指其意義之謬或摘其條例之疵或商其位置之宜或謀其贊力之便或相與襄贊而分占專門或代爲鑑裁而轉資臂助統希大惠無任屏營度大道爲公好成人美者必不以爲癡比愷之愚同劉畫而但目笑存之而不論也凡例四條如下一體裁宗法馬遷分列紀傳文則史也惟起自黃帝下迄明季通爲一編略如梁武通史鄭樵通志之式與兩漢而下諸斷代之史不同其事則一依正史參取通鑑續通鑑三通續三通及諸霸史雜史等一依經子之義擇其善惡尤著實可法戒者錄之藉備帝相將吏士女之鑑其餘日用尋常簿書期會之類概從常事不書之例一削弗登至於南董直筆元經仿書紫陽正統前人已定評茲不贅效一義類義必出諸經子或經子無明文則櫟括經子之意取足冠乎其類猶史記書表之有序也如帝鑑以修身尊賢親親敬大臣體羣臣子庶民來百工柔遠人懷諸侯爲義而分敬天法祖詒謀文德武略游藝及齊明盛服等類相鑑以道德才識忠義爲義而分正己格心盡禮納誨遠鑑深謀進賢去邪寄命託孤宣勞蹈節等類將鑑以治兵籌餉爲義而分仁義節制武勇誠信威嚴廉潔權謀技巧形勢陰陽籌備飛挽等類吏鑑以致富立教爲義而分勸農殖地治水種樹通貨救荒興學明義折獄治盜等類士鑑以明經講學修詞爲義而分易書詩禮春秋論孟孝經爾雅小學程朱陸王古文駢文詩賦等類女鑑以女學婦道母儀爲義而分賢明和順孝敬貞烈節義才能惠敏工巧等類義但絜綱類則隸事其反此者則附各類之末或有不備更議續增一筆削文必各据本史固已然自漢魏而降帝紀多不甚詳人君言動而散見諸傳中諸傳則各自具其人其事本末不必一一與義類符至士鑑一門求諸史文尤苦影響模糊無著手處倘竟無所筆削則惟照鈔紀傳舊文不出通志科曰烏在可爲鑑乎今擬移諸傳中所載人君事蹟言議還歸帝鑑其諸傳中事言之非義類者一切削之經學則依史漢舊法各立專家本傳或不足徵則刺取它傳它書補焉理學詞學亦率類是而自餘可知也蓋有不得

不筆則筆削則削者爾惟筆削之名非至聖莫居小子冒昧乃嫌僭擬
倘有易之尙惟惠我一考訂此書意在適用不屑屑於考訂然既貫通
全史則有紀與傳異者有傳與表志異者有本史無異而與它史異者
有它史亦無異而與通鑑它書異者紛紛岐出靡所適從不有以考訂
之安在折衷一是乎今做通鑑攷異之例爲比次其歲月斟酌其時事
而附考於當條之末并明其所以去取之由若但文字細微無關出入
事在可畧姑付闕疑惟於本紀本傳之外有所采入無論本書它書皆
必詳注篇卷以示徵信避虛造也森楷既刊行之仍附函諸友人詢其
意見并請代分布久無應者半歲餘樂山彭竹陽來書願獨任將鑑亦
迄未實行其議遂寢然當是時德廟西狩八國交侵森楷念大難之未
夷新政之且繇非可空言從事必將以擔負義務責我國民我國民僅
恃此區區舊業所得竭蹶供辦恐無以克當也爰本幼學壯行之義姑
舍前緒別發所藏農工商之學說徧觀而盡識之而得一就地之便適
時之宜最簡易最普通最有效力辦之又不可驚世駭俗者曰蠶桑學出
論同人僉以爲然迺議仿公司例民款民辦勸立四川蠶桑公社于合

合川縣志卷六十二序傳上

完

州之大河壩場延師招生用日本法教授以爲蠶學溥及之基楚卽爲
實業進化之階梯前後八年成效彰著今合種桑徧植川中出口絲充
溢海上其機緘實森楷啟之語具蠶業掌錄三十三年入京立蠶社案
見時事日非人人有亡國亡種之思吾川雖僻處西南而英藏交衝危
在朝夕不先事豫籌禍發將不可收拾民生塗炭國家傾危都在意中
不但蠶業受其影響而已旦晚焦思得若干條亟欲上達以補揀萬一
而少盡國民一分子之義務苦無繇自達乃藏之篋衍亦時以示人商
其所宜會朝廷下詔求言許大小臣工建白時事無官守言責者准交
部院代奏森楷乃投書都察院曰爲通籌四川應辦事宜並指經費款
項所出恭摺具陳請旨飭辦錄懇代奏事竊職西川下士知識庸愚本
無割雞之才略有育蠶之學未通朝籍豈識國情祇以國家興亡匹夫
有責政治不善其禍被于人人蠶業亦未嘗不與受其影響因切剝膚
之痛時思矯首之鳴天路無階下情莫達昨閱邸抄恭讀詔旨求言並
許呈交部院代奏職喜以爲此千載一時之會不可失也爰退就其平
日所見于四川應辦之事及見在得辦之端與可籌之款列爲二十六

條逐件詳說具如後方雖在川言川若無關於天下大計而見聞尙確規畫尙詳或不無一得之愚足供采擇謹繕錄成摺呈請鈞院代奏伏乞聖鑒交議飭行似于川事不無裨益此呈計開應辦事宜十六條一分立省治英藏雖已議和然其窺伺尤急邊衛益危非于川滇藏界之交另立省治設兵駐防未足爲保蜀計也上年中書尹克昌請分省建昌議未實行本年各報屢載政府議分川西省亦未發表皆以經費支絀而止且因朝旨已命川滇邊務大臣差足當其衝耳不知邊務大臣事權未重形勢不完贊佐亦甚寡乏豈能措置裕如擬請飭下軍機處資政院提出川省分治議案速行可決通過期限一年期內諸務成立庶幾自固吾圉藉抵外人如慮經費難籌則請暫由國家設法救濟隨責地方官紳擔任歸還但能信用無疑不出十年逋累清而形勢固矣二廣興邊屯新建省治固屬要地亦實邊荒非仿古人實邊之意募民墾田而屯兵守衛之道固難全濟也上年邊務大臣趙爾豐示招川民往墾給以餼糧貸之籽種民間初頗欣動旣聞其將按年徵租有類佃賃遂復廢然則以荒地皆爲國有故耳今擬改荒地爲民有請旨飭下兩

省總督及該大臣諭令所在各貨本家率人同墾或自親墾官不給費亦不徵租約定幾年照例升科以後永爲各人世業官兵但任保護之責無干涉之權斯必相率偕來蕪歲變膏腴矣三密備軍實英人野心旣露豈能株守約章鴻溝自畫則据扼吭拊背之勢蹈瑕釁而東出以與我相見于巴襄間固意中事也設不先機密運厚集其勢以有備而無患倉卒事起兵食無措如大局何擬請飭下兩省總督及該大臣遵照練兵新章及時訓練屯邊各軍卽就舊新各機器廠趕造新式槍炮子帽計日程功期令一二年中各軍皆足應用其馬匹芻粟亦並隨時隨地嚴密預備使人猝不可犯乃爲上兵伐謀各屬中小學堂亦令普習兵式器械等操俾有尙武精神遂完全有軍國民資格亦一道也四仿設佐官北洋東三省地方經政府議准每州縣治皆設視學理財裁判警察勸業各佐治官祿用員紳充之與該地方官分曹治事各員專責不相侵權甚合各立憲國平分立法行政司法三權之意但必辦有成效始推行于各直省爲期尙遠悵望殊深今擬不分畛域請令舊新各省一律仿設諸佐治官贊行憲政或有辦理違法許由各該議會上

聞或在行政裁判院控告處理斯可埽清專制舊習乃于政理較密不至敗由官邪五試用紳力紳出仕則爲官官在籍則爲紳而紳每不喜官官每不容紳雖曾駱之賢不免他何論焉然紳事簡可不求官官事多不得不資紳此政治家所以有用紳之說也川省賢紳多不任事不肖乃與官結而爲害于民民怨紳不啻其怨官則欲知紳之得力與否固不如先試之擬請飭下川督仿照湖南現行地方制所有理財視學諸事皆用紳會辦而以官監督稽查于其間有不盡力隨時更換如果可用量授鄉官六通籌公費官祿不足自養乃取給于陋規及其弊竇非有相贍理難澄清直隸所以有爲各府州縣籌定公費之舉也川省經前督臣岑春煊議籌公費札飭通行未就而去識者惜之今議增設多官參用員紳而不通計公私量給經費憂貧無暇事何治焉擬請飭下川督札飭各地方官具報歷來相沿應得明暗款項別令紳士交互查報以期合盤托出一無遁飾乃復斟酌改事勢化私爲公其有不敷則統計全省物力通盤籌畫務令酌劑得平免有集枯集菀之嘆七明示捐數川省歷辦酒捐肉捐燈捐土藥釐捐等項名目繁多數無統紀而

朦朧含混尤莫甚于隨糧捐輸如合州近年每原糧一兩完捐輸十三兩應是加十三倍而他屬乃復多寡不齊則莫知其等差之次矣其他捐項亦率類此何怪擁財者之不樂輸也今擬請飭川督轉飭藩司核明通省捐項共數若干實解若干留作地方公用若干其隨糧捐輸并須算明免捐州縣若干計有若干原糧下餘州縣原糧若干分若干等某等原糧一兩納捐若干作爲豫算表式刊列告示之尾年終決算報告亦仍列表通知人知涓滴歸公未嘗厲以自養捐數益起色矣八專理教約通商約章原任保護傳教後乃增益條目成爲通規川中官紳講求之者固少卽見知者亦正不多每有教務相干率致茫無憑藉非失之過硬卽涉于太柔外人見其可欺遂益溢出範圍之外教案乃以不可問也今擬請飭川督申明各國教約并合各省辦過教案彙爲一書通札發各州縣而專責成于警察裁判二官使其無事妥相保護有事善爲持平斯不至于袒教抑民卽不至于驅民入教教案或可減也九嚴查學課川省學堂成立經今四年各班皆將卒業而調查諸學生能有卒業程度者乃不多觀是豈學生過哉母亦其學課非也曩年馮

臬司煦總理學務查視綦嚴頗有進境後乃稍益頽廢幾至捲堂廢學而課遂不可復問矣擬請飭下學部轉飭提學使司核定某等學堂弟幾學期講何科學共分幾課教師何人講錄幾冊先作表式發交各堂勒限填呈乃隨派視學員前往覆核該堂現象是否相符獎其辦理有效者劾其敷衍無狀者自府廳以下無所貴斯學務振興人才倍出不至以課程不及貽人口實矣十編講治規地方自治規則業經通飭議會會員紳隨時講演京師各會亦既行之川省開化較遲奉命亦晚議會尙未全立講說吏屬不逞將來事勢推遷終有通行宣講之日特其是否合法有無精神則在不可知之數耳擬請飭下川督責成各屬議會員紳按照地方自治制度規程及各報中關於自治事宜論說逐照演爲白話約敷一月十講會之用裝爲一冊于三箇月內先行呈送以後逐月遞呈并將講員講所詳報以便攷查一切不至僅以空言塞責及辦不合法等弊自治庶可以實行矣十一多開蠶社川省本蠶叢舊國因不知新法絲質日衰近年乃有合州民立之四川蠶桑公社省城官立之農學堂先後以東西各國學說倡導流傳期于改良桑種蠶種絲

業綿業利益均沾而風氣不開響應猶少欲達目的尙自無期擬請飭下川督札飭各屬有桑處所多立蠶社實力講求並于各府開一模範蠶室以資表率其無桑處勒令趕種三年之後普令飼蠶略如學界之強迫教育盡人而施果能一縣平均有蠶社十數有養蠶家千數而慮民力不厚不能集事者未之有也十二遍設工場川省官立勸工局兼有教養窮民收回利權二義規樞既大程度亦高民間未易仿行前督臣錫良推廣其法于各地方應者殊少今擬變通其意請飭川督轉飭各屬議會視其本處民用必須而缺乏未備可設法籌措者不拘精粗貴賤俱酌提集公私款項購備材料食費招募工匠學徒尅日開辦工場限期售貨取給先使無業游民得以末技自效乃後徐圖進步可耳是在知勸工之道者十三精研商學川省原有商務局近又立商會出商報較文明矣但商賈中人向無學問現雖從風而靡實祇人云亦云非能實有公理公心以結商團厚商力求與于商戰也擬請飭下川督責成重慶成都等處特立商務學堂專講通商重要科學如商道德商歷史等皆西人所擅場而中國所缺乏者使各商家子弟肄業其中刻

意研求精擇而實行之不但區區品物簿記之末略存形式而已若此則商務克振不致如向之未嘗學問一遇而輒敗也十四實查礦產川省有礦務局又有官立礦廠而各屬礦產自英法立約所指定外如江北廳煤礦猶爲外人竊據不能收回豈甘棄礦之利哉亦未事之先不會實加查攷坐待他人發難乃始從而應之故常處不及之勢也今擬請飭川督仿照山東江蘇安徽等省辦法特設礦政調查局專派員紳帶同高明礦師實查各處礦山分別品物繪圖貼說估量豫算以爲籌款開辦之據如果確可徵信當不苦于無資特非影響依稀及專以官權壓制者所能奏功耳十五改良路政川省鐵路久滋物論現經郵傳部據護督臣奏派總協理解箴議會專以強權壓之川人心多不服風潮未已今姑不具論但念斯事體大就令奏派之總協理才品俱優一無訾議而在京者第能遙制在省者未敢獨行牽制因循不至開辦不時爲外人侵奪不止非自辦商辦之本意也擬請飭下郵傳部轉飭公同商會紳民議會協籌改良之法務使議論從合事權從分財用從舒工程從疾斯不至以爭競把持多費少成爲人口實路政乃可有起色

也十六曲恤農艱國朝顧念農民既定制永不加賦又于水旱告災立即分別蠲賑以示重農實則真正農民不必皆爲糧戶大半薄有資本租田富家與外國之佃奴相去無幾固不得沾薄賦之惠亦不克邀賑撫之恩往時年穀順成除納租外尙足自給近年收穫歉薄富家轉以捐輸爲詞什九操券取盈小農無可如何多有流離餓殍道斃溝瘠者則重農者所不及料也擬請飭下川督通飭地方議會酌定佃租中制勿過十分之五以爲平常通則遇有災歉仍照詔減成數減之或別議設田畷農官專司其事尤較完備可籌款項十條一化定平餘川省各屬徵糧多藉平色火耗局用等名影射浮收而巧飾曰平餘多者萬數少亦數百千兩損下而不益上治罪殆不勝誅然遂悉數豁除一不多取後或別謀公益乃轉無所藉資則固不如姑仍其舊而化私爲公之爲得也擬請飭下川督切飭地方官紳實報向來平餘確數由司覆校不謬卽予揭示定章仍令每年隨糧帶收特別存儲抵作地方稅項以爲本處各官公費及他民間公益正用斯政行而民不擾矣其藩司衙門平餘之外更有餘平所得尤多固應一體化定用資表率合計此款

歲可二十萬兩以上二實報契價川省田房稅契向爲州縣特別利權有于例定三分之外累增至八九分者又有以銀合錢就錢折銀之算門印書役皆得沾之年終但以契尾銀解藩司從無照例報解契價之事曩年因議賠款迭令倍解歸公略及十之一二然許例外加收二分所得遂轉溢于所解之外是不啻以國家急用爲若輩開利源也時惟前川東道張鐸在巴縣署任獨校歷年平均中數謂加七釐已足敷解特令邑紳附局帶收除解納外留作地方公用巴人至今德之今擬請飭川督通飭各屬立稅契局由議會推舉正紳加札管理開除解款公用餘供新舊各官及地方經費如猶不給准其酌量增加不逾二分之數而止或有不實不盡視其咎責所歸治以應得之罪約計此款歲可六十萬兩以上三全併鹽運鹽爲官家專賣品五洲各國皆通行之獨中國一異諸商謂不屑與爭利而日久弊積逋欠良多前督臣丁寶楨奏改官運商銷公家每歲所入不資獨餘上水商岸及各歸丁岸未辦前督臣岑春煊續辦商岸官運不及歸丁各屬漏卮仍留梟販轉塞猶有憾焉今擬請飭川督全將歸丁各岸併入官運俾鹽全售于官非官則不能運私梟無自得買斯利出一孔矣如慮官吏把持灶戶可危貧民難度應請特旨責成地方議會公議買賣鹽價官不得駁當可交易公平公私兩利約計此款歲可四十萬兩以上四更正彩票彩票爲賭之一大宗京外大僚屢經議禁而卒不能止者乘人人之欲望以誘之則道易從而事易集也川省開辦彩票多年尙無真正主名傳聞係因新機器廠籌款而設然既已所入不貲矣義固當挹彼注茲以酌盈而劑虛也擬請飭下川督仿湖北安徽辦法從權更正爲川漢鐵路公司彩票專作公司進款一切應行事宜俱照原章酌定惟須加入如不得彩可照原數減半作爲路股換取公司收票積成股數另換股票使人知進則獲大利退猶不失路東藉廣招徠而厚物力約計此款每年可十萬兩以上五推廣估平官估官平之設各埠皆有川省則內地亦多特其歲入之資半歸公用半爲私人分潤未能成爲大宗巨款耳現聞部議制定權衡度量準式不久必將發表若不通飭設局專司其事則各安于所習或且陽奉陰違未必遂能一道同風眞斟若畫一也擬請飭民政部責令議會員紳仿官估官平之意而推廣之統立一定準局

照所頒官平官秤官斗官升官尺定式如法製造公議準價請官示諭士民到局購領自用其商賈貿易則皆經用所在之定準總分局內之平秤斗升尺爲衡不准沿用舊式致成參差所取用錢仍照舊日分數惟略減其私利以裨公益約計此款歲可十萬兩以上六公存案費案之有費防自束矢鈞金所以禁民爲非不輕涉訟也特古有定數皆歸公用今則意爲多寡又分入私囊耳前督臣丁寶楨勒定衙規出示刊石各屬今猶遵守未敢多踰範圍然亦僅收除弊之功未獲興利之用也今擬請飭川督照直隸以警兵代役專條及外國訟負之家全賠案費通例通飭各屬設案費局先令兩造各繳全案規費俟定斷後分別收退悉數留作警費及地方他項公用庶不動輒需索亦不輕肇訟端約計此款歲可二十萬兩以上七清釐行用各質例設行戶給予牙帖准取用銀三分益周官質人賈師遺意間有虧挪侵欠之弊絕無詐僞欺騙之虞固保商之善政也川省通商口岸行戶甚多帖課無幾內地則每不設行戶而以經紀代之其所取用乃有四分至八九分者仍多朦混欺騙甚乃竊負而逃市面衰頽恆必由此擬請飭下川督傳諭議

會員紳各就本地市實情形酌設公行三處照先所取用錢仍顧原經紀人分任各事酌給辛力其應繳牙課則照江蘇現行規例十倍加徵除開銷報解外餘悉存作地方公費既昭信實又不虛糜亦公私兩利之道也約計此款歲可十萬兩以上八監收船規川省江流四達舟楫如林司其事者向于官徵船鈔之外假借灘口淘漕差徭焚獻病院等名分立各河船幫公所徵收各船板主篙師規費由數十百文至數千不等分別上下停泊過江次數有差大率質盛船多之埠一幫一年可收錢萬餘串次下以此例推實在開銷正用者不過十之一二藉名廟工戲酒等濫用者約十三四餘皆幫首及各土豪地棍瓜分私潤未嘗一毫謀公益也今擬請飭川督切諭地方官紳令各船幫仍舊徵收但特選派正紳爲之監督開除各幫切實應用尙有餘存悉作地方公費無許冒濫浮侵違則計贓論罪仍著賠償約計此款歲可二十萬兩以上九重抽戲釐川省之抽戲釐自金堂縣始近年籌議學費各屬乃始仿而行之然或演戲一日抽釐一千合演十日抽釐數千爲數旣不甚多又率故事奉行不實不盡非靡者使微意也今擬仿外國奢侈稅值百

抽百或抽二百之例加重戲釐如其戲價之數無論酬神宴客一律責令戲班照繳仍請飭下川督專札議會員紳通飭立戲釐局酌定章程切實收取如有扶同徇隱等情應按匿漏之數科罰十倍勒令局士戲班分繳充公以儆尤效約計此款歲可三十萬兩以上十量加地稅外國有地方稅與國家稅相對待中國無之每有地方應辦公件籌無的款則以勸募從事而民智低下萬說無功乃智取術馭刑驅而勢迫焉斯罔民取之矣方今立憲時代豈宜有此應請飭資政院轉飭各會議紳按切地方應行新政實在須款幾何如上籌諸款尙有不敷准其作豫算表報請該管官司量加地方稅項詳奏准行既訖仍作決算表報告查其有無贏餘隨時消息此款不能豫定權數大要取足爲止奏上奉旨此摺著交四川總督議行欽此

案此摺當時曾由北京日報重慶存藏稿亦將原摺佚去今憶補之故不能具錄求言論旨原文僅無存概畧而已有存該報原底者仍以該報所登爲正森楷附記後不知其如何森楷不復過問惟專注意蠶桑而已顧以性不諧俗卒爲僉王張駿驤等所陷知州楊體仁委員徐文杰交構成之遂以侵蝕罪請暫革刑訊勸業道周善培疑焉電令解省親審一無左驗而盡得其賄

合川縣志卷六十二 序傳上

五

誣狀迺以無罪定讞仍屬森楷治蠶社事森楷請論誣告如律不許森楷遂決辭退且微詆其徇情曲法非勸業意周善培怒斷令社產歸合州公家以抵還其公股及補助費社債歸森楷專收社生報效費以償之森楷不服守省訟爭成都中校校長林思進聞其事遽以中史教員相延聘也先是森楷以人表校勘記故肆力史學者二十二年蠶社事起措款滋急有暇則研究蠶學或應付社內外事非舟輿在道未嘗一寓目日報其它可知蓋與諸史闕別已八年于茲矣至是重理舊業時啟新知因學生年級之淺深爲教員講授之程序撰爲華夏史要二十卷大旨以歷朝系統及興亡大略爲第一年級朝政治亂及上下賢否概略爲第二年級歷代用兵始末及其得失爲第三年級累世典章制度禮教風俗文學術業之沿革爲第四年級提要鉤元無遺無復既而教案編制案下各級學課皆有量不能意爲增減乃改以第一年級爲初小教科第二年級爲高小教科第四年級爲中校教科以勉合其程度其第三年級則竟從刪汰或于高校肄業及之而學者頗欲聞戰爭厓略往往私請業焉故今通行之華夏史要本猶兼兵事存之云是

時新政進行漸滋流弊省諮議局友人有訪以救弊策者爲代艸議案三條略曰吾國治化不進論者多以爲防弊之心密杜弊之法精人遂相遁于所不及覺之地誠不如疏節闢目弊猶罕生而易除也吾謂不然果使精且密矣弊自無由而作今作弊者紛如不有以杜而防之顧欲望其治化之進得乎謹條舉之如左一用人之弊新政用人奉文首及法政以新政條件非舊學所諳亦非普通學所習苟于異人是任不合法者必多斯不得不特重法政也然法政學理精深齟密必須其人學有根柢又能觸處用心仍依正科年限畢業庶或融會貫通應用無滯若近年本省府屬新設之法政傳習所自治研究所等遠則一年爲期近則數月而止曾無延長至八月之校即使所內學生皆能專心致志亦不過得粗淺皮毛未足辦事况其品類淆雜假曠尤多空腹高心自不待論當事一奉憲檄不暇致詳但聞法政之名卽以神明相奉優薪崇制一聽所爲究其知識技能則自上詔下驕而外別無見長之處甚且開娼聚賭攬訟譎贓種種不法行爲多有鄉人所弗屑者則祇采聽虛名不求實際之過也邇來京省學堂逐漸畢業歸盡義務伊等

恐其見奪輒與本官勾結互相黨援苟有舉發力代掩飾更乃巧構形似傾來者而逐之則新政無復望矣擬請以後新政用人必須查驗憑照先用法政學堂二年以上優等畢業者次用傳習研究兩所一年以上最優等畢業者其不及一年或滿年而畢業在中等下者一概卻不取用卽其才尙可用亦祇能任鄉區分局司事積功候升不准肆意鑽營躡管統計自治調查等重要公務從前有誤用者請由本局決議行知各屬一律撤換或者流品稍清新政差有冀也至近來新派之礦務理事委員勸業養成員農業會長等並以不知誰何之人一經得札便高位置呼明引類浮濫尤多亦請商由不駐省議員及本處鄉紳隨時查看報告如其人有不妥應照上項處分法政學生條例辦理二行政之弊行政向屬官治範圍今于中央行政而外特別之爲地方行政各種則分官治而民治矣在有國民資格者固必按照法理斤斤求合乃後施行唯恐稍有違踰致以妨事擾民貽人口實其程度不及之流則徒有事爲榮任意爲快卽如統計一項憲札飭以法政學生充任現無法政學生之處則以司選員兼充用節經費其調查之件併歸統計委

員兼理所附簡章未條明有調查員卽統計委員之文而竟別設調查
總局分局于城鄉各區區各有調查長調查員數十數人不等並各
建築局所爲該員長辦公專地外設門役聽差內立收支文案司事等
職常川住局員長偶一臨視出入皆有呵衛夜則籠燈前導襍用二人
四人有差其餘一切體制大約與統計局等現在調查行政僅有戶冊
一端往往因爭正戶副戶名目輒將該戶鎖押數日罰錢贖罪乃已至
于戶冊之外兼查民間奸盜詐僞等事已非其所得爲而竟有因小孩
竊取苞谷數枚飭鎖其父在局除已罰去押錢六串更令繳錢二串幾
至釀成命案者鄉人積不能忍相率赴州訴官或由統計局勸回或爲
統計局先言于官照原懲治卒無發覆平翻之望民不知係局員妄爲
以統計調查性質如此是散數十百官于城鄉不如向祇一官之愈也
而新政之機沮矣查而禁之是在本局之決議耳三籌款及用款之弊
政非款不行則用款不能無卽籌款不可緩矣而籌款者動藉新政名
目竭澤而漁如菸稱雞稱羊市牛市糞捐花捐等雖皆瑣屑不經第猶
勸導而巧取之未嘗迫勒而豪奪之也近日辦理新政各紳專用一般

合川縣志卷十二 序傳上

三

游閒無賴偵探各處僧寺神會虛報影響密請查辦一得硃單論帖卽
往統搜搜索探囊胝篋與賊無殊大要以得現有錢物及其田房契佃
典貸各約爲目的物不得斷不肯止偶有地方團保過問則以阻撓新
政誣請究治太半獲咎而歸後遂無敢復出氣者漸乃及于慈善事業
漸乃及于愚懦富家而八公山艸木皆兵鄉人遂無安枕日矣然使其
果用之新政則雖燒經劈佛賣兒貼婦猶是爲我國民供犧牲也夷攷
其實乃派局費各貼錢千餘串紳費各貼錢百餘串至三百串而又派
各場出錢各數十串派各戶出門牌八十六文又約數百串取之無
藝用之不惜民獨何罪驅飽貪狼尤可怪者勸業礦務農會各員一事
未辦需素尤豐勸業竟有歲至八百餘金者代價如此成績幾何豈將
以萬人膏血空給此四月養成之數人咀嚼乎不平謂何言之髮指擬
請本局議決凡辦新政各紳所支薪俸不得過舊管局紳之數其札文
中定派銀數暫不實支俟辦有成效後照數給足儲廩稱事斯不虛糜
或謂如此則新政無辦奈何不知新政博大密合誠難若照現辦之事
則固夫人能之前仆後起政界常新想當不虞廢弛耳局友照提議案

通過咨行弊爲少止至宣統末鐵路漸起當事者名爲收歸國有實則
抵押借款間接售與外人川人蒲殿俊羅綸鄧孝可等不勝其憤輒開
鐵路臨時股東會以正式爭之別更風示城鄉市民約集同志會立壇
臺奉德宗主百十爲羣請求收回成命所在麤聚不可勝數川督趙爾
豐一切不省專欲以威力壓之遂相持不下造言生事之人迺謠傳同
志會陰結諸不逞將謀不軌勸趙督先發趙督不察遽于其年七月十
五日發兵圍路會捕會長顏楷張瀾去并逮諮議局議長蒲殿俊羅綸
及鄧孝可等十餘人示言首要就擒蓋以逆犯待之眾愚禍不測致洵
洵而莫敢先發惟城內同志會數百千人犯凍雨持香跪督轅請罪狀
諭之不退則開鎗擊之有死者前仆後繼十餘擊猶如故乃止勿擊亦
不去比天明始稍稍散而沿途纍然陳死人矣是時森楷以股東代表
自府校赴會與在圍中夜分乃歸涼雨美睡不知慘象之至是也天明
聞狀往見高校校長周鳳翔謀折東邀眾議公舉代表謁總督將軍爲
道地有舉森楷到南院者辭以性强語直恐非事宜乃改同黃芝等七
人謁將軍至小東門爲衛兵格不得入暫止餅肆而以名通並言所以

謁之之意將軍玉崑故有賢聲者旣得刺則列仗相召而自以便服出
見顏色甚和先云來意已知但欲我何作森楷爲言蒲羅輩皆以書生
好議論非有逆謀今趙帥目以首要似非尋常罪名萬一有不測處分
而罪狀未確民其謂趙帥何且趙帥示言脅從罔治今晨乃添捕閣一
士蒙裁成旣與先示不符又使人人自危似非地方之福森楷等此來
乞求軍師以此情上達務審出之勿艸艸不可悔耳將軍誤以上達爲
上奏謝言將軍之官自前督趙兼署後奏罷一切舊制範圍遂僅限于
成都此事之初諭旨皆我轉告趙帥今顏蒲輩並朝官若未奉有諭旨
趙帥何敢捕之而我初不預聞卽朝廷意向可知矣其何能與爭邪森
楷遽言蒙等所謂上達者沿習俗下情上達之說欲乞轉達趙帥耳非
謂聲聞于天也此何如時此何如事何敢求與彼角惟軍帥督之將軍
欣然言祇如此我尙能辦特口語無憑亦難記無遺漏可開一事由單
來我當据轉或有效也森楷云當遵照第爲日差晚繕錄須時恐呈遞
少遲傳達不易乞飭兵衛破格收之將軍許諾並言事由單只記事由
行艸俱可不必眞書以速爲佳惟我爲其內君等仍當公贖保證以爲

其外蓋兼營並進不可偏廢者也森楷等辭出多以日旰未食各歸其家獨森楷及內江張文倬至鐵道學堂晤鄧孝可弟孝然相與屬艸艸訖呈轉如言明日而將軍總督往來解釋之信息徧傳通城矣昨所舉謁總督之代表八人乃猶未通刺也異哉然森楷猶未遂絕望也又明日走諮議局見素識議員某某等商略公呈事皆默不作聲祇宜賓某言議會以議長爲主體今皆被逮則主體已失某某等議員猶之箇人法不能用機關名義效安從生不如且徐圖之森楷以爲議長雖爲議員之首議員實居議長之先主體所存固當屬議員不屬議長卽以機關代表爲議長特權無議長卽無機關效力無自發生試問議長事出以後眾議員亦支薪否支薪則可呈保則不可吾初不意法理之不通至此極也人謂公等作法自倣我直謂公等藉法自藏耳亦安用此法爲且我爲路股會員我視會長與議局之議長等故特相要結今若此則議長聽天安命矣予固不能坐視會長之捕而莫之救也語已拂衣去適州人黎懷瑾屬路會公呈草藁爲點定之以交鐵路總理曾培使繕正以進培請領銜之名予以謁將軍呈事由單皆森楷領銜茲復用之

是近于私且示森楷外無一人也無己其由公司呈文乎培依用之數日得批千餘言約述同志會陰謀圍督署燒良醫巷狀及事在危急不得不然之意見已聞奏應候旨意查辦原呈殊屬誤會礙難允准鄧孝然見之謂無可挽回謀入京叩闈瀕行以其兄或不諱妾蕭必身殉乞代售其新置姪女奩具爲殯殮費未死以前無人爲照料先生父行也一推愛及之存歿均感森楷慨然許諾乃間關去時省外同志軍起日夜來攻城索蒲羅等一見以知生死或請如其言藉紓兵禍趙爾豐不許而出兵擊之下令戒嚴益增加蒲羅等罪名並連坐交通者朋輩皆相顧無人色至發一言必左右望乃出聲森楷獨義不能忍攘袂奮曰是尙有人理哉若等盛年可爲以爭路故旦晚不保民氣盡矣國奚以存森楷垂老向盡尙何惜此區區餘年不再爲力爭以徼幸萬一也卽不謀于人自削艸二千餘言駁其批詞有青天白日萬目睽睽何能以影響之談作爲事實上陳殿陛下示民間等語直批逆鱗勢無反顧蓋置禍福于度外甯與臧洪同日死不與將軍同日生矣旣上旬日音響闐然或知其內懼事且中變乃各以紳學名義投詞質問日數起至十

數起趙督均置不畲而岑春煊端方查辦之命朝廷且相繼下也漢陽事聞諸人獲釋森楷往見之唯鄧孝可以其妾語頗致感荷餘無他辭森楷亦絕不齒及之故至今無有能詳其事者祇民國五年森楷充鐵路清算人時蒲殿俊等來電相詰讓森楷覆電略陳其概亦不甚觀縷則雖懼伯仁之禍猶不居仲連之名耳壬子紀元路議又起彭縣都承蘇在渝謂森楷曰路款空矣萬無成立理時移事異曷不讓路國有尙可望歸款乎森楷以昔力爭路今言讓路疑之則云爭路者爭不爲外國有讓路者讓爲國有兩不相妨何惑焉森楷聽其言遽赴會首提讓路國有案得通過繼議整頓公司及清理銅元廠二案亦贊成者多因票選森楷充任鐵路總理在職十月查出銅元帳款一百九十餘萬金爭得歲息三年加入路款二百餘萬金擲節局用二千餘金因擲節故積不悅于董事及查帳人建議改總理爲董事聘用不由票選復開股會決之森楷遂去總理選充董事方交代之際都督胡景伊入譖言以森楷虧挪巨萬方設計彌縫若驟掩之可得其真相卽乘星期外出之罅令其科員督警兵數十人入公司勒收支庫員開庫驗見金如帳所存

數無絲毫誤始嗒然去森楷歸不平其所爲上書問警察侵入狀仍束請在省股東及紳商學界並都督莅場監視交代卽公開談判屆時都督謝不至塵內務司尹昌齡警察總監戴鴻疇來視交代畢悄然自退應取總結應開談判皆不相料理森楷無如之何則具錄其始末爲交代報告書播布有眾胡景伊內媿囑共和黨長賃浴來勸止願以某報館總編纂相處月奉百金爲壽再言之卒不聽景伊亦無如何而銜森楷次骨矣未幾鐵路會開攻擊董事違法濫支鐵道銀行抗令開辦等事甚苦將解決間適重慶二次革命軍起省城戒嚴銀行遣人到會拉會員徐回天去交都督署斬于市會眾駭散森楷遣人密殮徐不達乃取道川北歸至遂蓬交阻戰線弗能進止宗人張驥家旬日始行則渝軍敗矣又閱月事略定方謀到省結前案忽傳本州奉有胡景伊文內開鐵路總理彭芬董事向藩等呈偁張森楷句結徐回天掠款五千金潛逃在渝復同楊逆庶堪逼勒管款員都敬皆將渝局存款十餘萬兩盡數獻作熊逆軍餉事敗夥逃請予緝拏歸案究辦各情森楷自具呈辯證復由本州鐵路局公證保明請予取銷通緝由其赴案投審批駁

不行並有前經通緝未獲現奉部咨嚴緝之說森楷以為根據在京非

本省能了即辟地入都至黃陵廟度歲有感懷五言排律詩云憶昔年

辛丑梁山趁歲除有親當獻壽為子敢安居失恃三稔後悲觀十載餘

蠶桑辭社長蟬竹授官書充省校一旦邦新命千秋史在閩還山完故

我若漢笑何渠舊雨尋花徑春風戀草廬團符方謝汝時借辦公民自保團成而去

路政乃嬰余謬欲愚忠效公將義憤據大端先改革宿弊盡心常愠悠悠口屢虛牢籠同指鹿刀俎獨為魚會集齊盟再梳悄悄

懷申直道初風雲旋變色胡軍起江海頓歸墟縱散諸侯約囊空季子

儲飛錢勞武吏謀長張捷先許贈千元留牘慎文胥羅織言真巧牽

連計轉疏法庭無左證黨禍有前車且望門投孔安期榻下徐西行殊

慘痛北上倘吹噓星紀將窮矣烟波盍去諸亡逋羞季布恭敬謬相如

濟陵知事張星平利涉天能鑒常談客共舒黃陵朝檣棹白舫午停漁

同年惠贖百元申守朝仍甲子書頑愚得砭訂歸去事耕鋤吟成自跋云民國癸丑辟

地東下歲除之夕泊舟黃陵廟更闌人靜寢不成寐撫今感昔若有所

合川縣志卷六十二 序傳上

思口占此律無當大正然情事略具亦森楷十餘年之歷史也遇而存

之所謂有詩為証云爾若以比開天傳信靖康辨誣則吾豈敢蓋撫時

感事亦詩史類也餘若宜昌和曹漱珊自壽都門寄懷戴子和七言律

詩及次子和見懷七言絕詩諸作僅供唱酬無關世事皆省不錄及至

京循例投首交通部以本部無緝案見卻下轉訴總檢察廳候批之頃

端居多暇更就史記校勘記加入訓釋為史記新辭注一百三十一卷

自序一卷十閱月成當民國四年三月實陰歷甲寅十二月也序見本

書藝文掌錄未幾總檢察廳令飭四川法庭特為森楷提起公訴依法

查拏呈控不實之彭芬等到案依法究懲仍令森楷回籍聽審顧猶礙

于川通緝不能自還則分呈司法部陸軍兩部以命令取銷之迺獲西首

而旅京遂十九月矣濱行閩人林萬里見廿四史校勘記藁而偉之任

介紹于上海印書局俾附全史以行先督森楷為之序因自序曰廿四

史校勘記為四藁者史記十卷漢書十六卷後漢書十四卷三國志六

卷為再藁者晉書十卷宋書八卷齊書四卷梁書四卷陳書二卷魏書

九卷北齊書三卷北周書三卷隋書七卷南史十一卷北史十五卷唐

書五十卷舊唐書五十三卷爲初藁者五代史記十二卷舊五代史十八卷宋史二十卷遼史六卷金史八卷元史十卷明史十九卷都三百十八卷合州張森楷以前清光緒五年秋從事朱墨至二十六年冬殺青斯竟凡積二十三年之力而成初未有序例也民國三年森楷客京都稍出所著以質于湘潭王檢討先生及富順宋育仁宜都楊守敬新城王樹相南通州張謇仁和邠章侯官陳衍儀徵劉師培諸名宿皆許爲之序而訖未有序來森楷乃取所爲史記校勘記更訓釋之爲一百三十二卷附自序并例言一卷中頗及校勘記全書厓略意以此書卷帙繁重已既無力行世世亦豈能任勘印者則將終度篋衍或遂藏之名山引其緒于彼特以留待後人耳非亟亟爭當世名也明年三月侯官林萬里從劉師培許見齊書校勘記而偉之詢知其梗概任爲紹介于上海印書局俾徵坳于各史當卷之後如阮氏十三經校勘記例并督森楷自爲序及例以論其趨悞森楷作而言曰天地大矣古今遠矣術學博矣森楷蟻蝨其間殆么膺不足比數卽有所甄錄不過起發疑誤藉備遺忘充其所至亦祇在不賢識小之列而止曾何與于作者之

合川縣志卷六十一 序傳上

聖

林顧津津自明其趨悞乎所繇成書十四年猶未及爲序例者此也若不以著作論而但言其所以校勘之故及校勘記所抨擊之由並其履演屢進而卒底于成之層累曲折旣于史記新校注序例略發之今亦更可得而言焉蓋森楷生魯甚凡儒先所傳天人性命諸學說讀之多格格不能入獨于古人行事與其時之典章制度暨其國家廢興存亡之跡每一瀏覽則心爲之開或廢寢忘食以終窮其究竟其志意所注固天性然也故當吾蜀經學方盛時代而森楷特以爲史學聞然史籍浩繁往往一人一事或彼此互異或前後頓殊甚至一簡之中數行之內亦不免于牴牾踳駁而尤以在字句點畫間者爲多森楷病之則援史公整齊故事誣正文字之誼以自立標準遇疑事譌文必反覆推勘務求其審偶有所得又慮爲前人已道或有軼聞別解爲己所未見不敢任己意下雌黃但隨筆錄記爲讀史質疑以就正有道初僅囿于漢四史射洪劉光謨見之謂肌測所及多有與古善本闇合者誠以此精力通之全史徧觀盡識當能匡謬正俗補闕拾遺裨益來學不少森楷感其言因借書于渭南嚴岳蓮家以肆力全史之學邛州伍編修先生

聞而嘉焉爲假館授餐遂卽就質疑緒業賡續至晉宋以下然其所傳舉猶苦心孤詣必自己出非有糾繩補正絕不拾取前人一字一句以蹈剿說雷同之嫌也壬辰癸巳之交遵義黎觀察先生備兵川東招致幕下告以學爲公器無宜自私經經阮氏校勘備列眾證經文益明乾隆勅刊殿本諸史每卷後附以攷證多舉疑義若與阮同功實則不逮遠甚今子所著質疑固較過之若依阮例襍采諸家撰爲廿四史校勘記當與阮經並傳何拘拘私著之例必溝他人而絕之邪森楷初謝不敢任旣諳誘數四迺蒐羅昔今諸攷史家之說依元文次序加入如黎言會癸巳計偕入都徧謁當時學者常熟翁同龢長白盛煜紹興李慈銘江陰繆荃孫福山王懿榮合肥蒯光典南海康有爲之屬而請求其攻錯非有結納標榜之心已各出所見相餉遺具載師友贈言錄猶以爲未足復走謁德清俞樾于蘇歸安陸心源于湖而觀其韶宋廬臧書錢唐丁丙家三萬八千卷廬所臧書亦與廬目焉陸嘗謂森楷校勘記特精密惜限于方隅寡見宋元本不能如阮之宏富倘來客吳越當爲作南道主人不憂筆札也森楷心良喜擬遂從之遊值陸卒不果仍還理

舊業于蜀因屬定清彙三年得卷數如上其五代史記以下數十卷僅草藁未付繕非故留缺遺以見本尤稀視前書不稱直如良工之璞尙未可示人耳顧亦竟無有過問者癸卯張文達筦學號能宏獎因以原書上請評定見諭慰甚至卒以非時好謝不爲流傳罷歸寓海上上虞羅振玉索觀之謂是全史功臣一經播布卽爲史學家所不能廢盍付我以待刊全史者印行可乎森楷許之致珍重去丁未再遇于都門未得當無以報也自後遂不復相聞固南北乖隔亦天下多故滄海橫流矣去歲森楷至上海遇并研龔煦春遽言子著述散矣徵其說則見樂至謝無量有鈔本新舊唐書廿所册册皆署森楷名問之迺其前數日以賤直購得之擔頭者也森楷大驚異亟走訪無量舉以見還隨寓書東京問羅君餘簡所在覆言幸俱存祇兩書軼太半意甚恨得君友復完殆神物呵護非偶然也今不敢更留寄由繆太史轉致之書至森楷已如京繆取陳書與其所舊校者對勘坳言心得頗多能益求善本張吾軍則幾矣森楷韙所云卽更謁京友求舊內府館閣藏書之數及所以借讀之方乃聞祕籍珍編強半散佚存者禁錮如故不予人以易窺

其圖書分館所存並祇尋常通行無足發新知者而故家遺籍又率收拾南去罕留此間卽有一二舊人習爲收藏賞鑑亦僅吉光片羽斷楮零縑不成大宗難資攷究至若冷場荒肆本屬駟僮行爲近因外人價收益復居爲奇貨購求匪易假借亦艱轉質多人說率類是補校初意不禁廢然等而下之卽覓兩監殿本之宋後五史以繕完前缺亦倉卒不可得最後楊守敬書捆載北來頗多佳本面請借證亦已允承俄歸道山願訖未遂則文學之窮自古歎之矣今林君獨能驛騎其間並商及板權所有俾此書得及時發見于世不至空山風雨徒飽蠹魚而森楷亦遂及身得觀厥成其相貺爲何如邪雖然此特林君意耳未諗茫茫前路果能設館鍾山開局涑水假南面百城給吏夫十數供我探討指揮使能勝任媿快無豪髮遺憾否然卽持是以往而各史之事跡舛謬文句掇漏未經指正者已不在多數居嘗自詫全史待訂者約十分合宋以來至晚清諸史學家得四分此校勘記可三分弱得宋元諸精本補充可三分強餘三分以俟後來誠謂誤書落葉此事原無盡藏亦見森楷自視猷然終未嘗一日滿足也世有知言君子倘不河漢其言驚怖而無極乎因敘述之如此迄至上海終無成議仍篋書歸以九月抵省距高檢廳請傳歸備質之日甫四月也地方審判廳乃先數日決定免訴森楷謂不適法抗告上控歷十三月卒無效卽吾川司法之程度可知已